

ترجمة الهدية الرشيدية في الاجتماع بسيد البرية والتوجه الى النفس القدسية
على صاحبها الصلاة والخير

ياخود

مِائَةُ الشُّهُورِ لِلْجَدِيدِ

مؤلفي
شيخ محمد اسماعيل افندي
مترجمي
مكتوبى سرعسكرى
حضر تلرى
احمد مختار

آيينه جمال جميل محمدى (عليه السلام)
وجدان پاك كوهر اهل يقين اولور

اولمز اونور اقدسه مجلاى انجلا
اول دل كه آن وابن ابلاه ظلتقرين اولور
لمحرره

معارف نظارت جليله سنك ۱۱ شعبان سنه ۱۳۱۱ وفي ۵ شباط سنه ۱۳۰۹
تاريخلى و ۸۲۷ نومرولى رخصتنامه سيلاه طبع اولنمشر

درمعات

محمود بك مطبعه سى

۱۳۱۱



SÜLEYMANIYE G. KÜTÜPHANESİ	
Kısmı	Tekkeler - Hacı Ef.
Yıl	
Esli	248
Tasnif No.	



بِسْمِ اللَّهِ الرَّحْمَنِ الرَّحِيمِ

الهی ، فاتحه کتاب مبینک ، کلمه محامد اشتمال
 الحمد لله واولین فیض تجلی جمالک اولان رسول امینک
 (لا احمی ثناء علیک انت کما اثنیت علی نفسک) مناجات
 تقدیس آموزانه سیله حمد تناهی ناپذیر عظمتکدن مددخواه
 اولنجه بو عبد حیرت شعور ، بارگاه استغناپناه عزتکه
 نصل عرض حمد و ثنا ایده یلور . الہی ، وجودی ،
 جود فطرتک . روحی ، نفخه هویتک . حیاتی ، مایه
 عنایتک . نفسی ، عطیه رحمتک . کلامی ، فضل قدرتک .
 قوای بدنی ، ودیعه عظمتک اولان بر قول قنغی لسان
 و بیان ایله دعوای محمد تکذاری یه جسارت بولور .

جميع اثنیه و محامد ، تجلیات نهانخانه وحدتکدر . ترجمان
 حمد و شکران اولان لسان و بیان ، صنع و النہام
 بدیع الحکمتکدر . سبحانک ما اعظم شانک

اعتراف عجز و حیرت

ذات بیچونک تنزه اعتبار درک چشم
 حمد لطفکدر تقدس پرور صنع بیان
 کیم اولور نوع بشر دن حد شناس رحمتک
 کیم بولور حمد حقوق فیضکه تاب و توان
 رحمتکدن بر کر مدر رحمتک یاد ایلیمک
 نعمتکدن بر اثر در شکر نعمت بی کمان
 حمد و شکران دهان آلود کان معصیت
 درکه لطفکدن استمداد غفراندر همان
 ایمدی بادیه پیمای سافلینکاه معصیت اولان بو
 سپهر وز کار ، تعلیم ادب آموز عنایتک اولان « ربنا

ظلمنا انفسنا وان لم تغفر لنا وترحمنا لنكونن من الخاسرين»
تضرع اخلاص پرورانه سيله هميشه چهره ساي خاك عجز
وعبوديت و تجلی جوی انوار جمال رحمت اولمقدن بشقه
نه ياپه بيلور؟ نه ديدم؟ ياپه بيلور می، هيپات! نه بيوك
دعوى! بو حال عجز اشمال دخى مجرد توفيق وهدايت
الهييه كله جلوه پيراي حصول اوله جق سعاد تلدند.
رب وفقنا لطلب مغفرتك ونيل رحمتك.

ای خداوند بیچون وچرا: نورمین جمالك، واسطه
الفيض رحمت لايزالك، محمد مصطفى عليه اشرف التحايا
عشقنه بو كوته نظر اسرار حقيقتك دیده بصیرتندن پرده
غفلتی آچ که نظر هدايت جویانه سنده « لا اله الا الله
محمد رسول الله » سر منورینك تجلی سیه کند یسی
قریرالین فلاح سرمدی وروشنظر جمال جمیل محمدی
اولسون. ربنا انك سمیع الدعاء ربنا و تقبل دعائی.

عرض مافی البال

طلبکار جمالکدر نکاهم یا رسول الله
کسلمز سوزش حسرتله آهم یا رسول الله

امید وصلتکدر بو تعینگاه هستیده
صفای خاطر حسرتپناههم یا رسول الله
خیالکدر همیشه نظره گاه چشم وجدانم
بود عویده ینه سنسک کو اهم یا رسول الله

بو حسرتله فدای جان ایدر سه م خاك قبرمدن
فغان ایلر چیقان هر برکیاهم یا رسول الله
غبار کویکه یوز سورمکه شهره معنادن
غم عشقکله هر شب رو بر اهم یا رسول الله
حریم در که عرش آستان حضرتک بالذات
نولور بر لحظه اولسه جبهه کاهم یا رسول الله
تجلی جمالکدن او وادی مقدسده
وجودم محو اولوب بیتسه کناههم یا رسول الله

بحق ذات باری نور فیض التفاتکله
منور قیل مدد روی سیاهم یارسول الله

ره عشقکده پامال فنا اولمق دیر مختار
بو حالتدر علو عز و جاهم یارسول الله

صلوات الله وسلامه علیک وعلی آلائک الطاهرین
واصحابک الفائزین بنور الیقین یارسول الله فی کل لمحۃ ونفس
عدد ما وسعه علم الله .

تحدیث نعمت

ای واسطه الاستمداد کائنات ، تأیدخواه دین مبین ،
حامی یکانه مؤمنین . مهمساز رحمتسرای قدسیته . خلیفه
عدالت منقبتک ، جهانبان دل آگاه . محب اولیاء الله
برکزیده سلاله بقا بنیان عثمانی السلطان ابن السلطان
(الغازی عبدالحمید خان) ثانی حضر تترینک ازدیاد

عمر وشوکتی وکمال توفیق الہی یہ مظہر یتی ایچون شو
صورتلہ استمداد فیض شفاعت ایلرم :

ای نور ازل ، واسطه رحمت مولا
ای جوهر آینه اسرار تجلا

حقدن نہ دیر سهک او بولور جلوہ امکان
هر عرضک اولور قابل ماہیت اجرا
بالای حرمخانہ غیب ازلیده
ای مظہر حق ، ایلہ مناجات و تمنا

سلطان حمید الشیمک دولت و عمرین
مزداد و فراوان ایدہ خلاق برایا
هر مقصد حکمت اثرین ایلہ آسان
هر حکمنہ توفیقن ایدہ یاور و همپا

اورنک خلافتدہ ایدوب مظہر تأیید
کوکلن ایدہ انوار فیوضاتہ مجلا
عسکر لری اولسون ظفر افروز جلادت
هر یرده نکونسار فلاکت اولہ اعدا

بوامت مرحومه یه بخش ایلسون الله
 مقصد بودر اول شاهی کفی الله شهیداً
 امت ده سنک خسرو عالم ده سنکدر
 خدمی دعا استمک اول شاه ایچون اما
 هر نعمت ایچون شکره سن ایتدک بزی مأمور
 ای شارع علوی نظر ملت غرا
 اشته بزه بر نعمت حقدر او جهانبان
 شکر ایتمه در اول نعمته بر نعمت آخری
 توفیق الهی ایله اول خسرو عادل
 قیلدی یکیدن سلطنت و دولتی احیا
 احکام معالی اثر دین مبینی
 ایتکده در اقدام هم پروری اعلا
 معموره فیض اولدی زمانده جوامع
 توحیده تجلیکه نور اولدی تکایا
 معماری اطفیله او خاقان زمانک
 چوق خانقه و مسجد اولندی یکی انشا

دارالحرم اقدسکه بیت خدایه
 تعظیم شرف جوینی قابل دکل انبا
 فیض کرم و همتی کلدی فیضانه
 شاداب رفاه اولمه ده در یثرب و بطحا
 حجاج هدا پرورک اسباب حضورین
 اکماله فدا قیلمه ده در همت اوفی
 یاپدیرمغه باشلاتدی مبائی جسیمه
 حجاج سفر پیشه یه اولسون دیوره آوی
 اول ابنیه نک اعظمی مهمانسرا در
 دیگر بریدر خسته لره ملجاء و مشفا
 بو خدمت دینیه یه بو همت پا که
 حق عزوجل کوردی ازلدن انی اجرا
 هر همتیدر امته بر لطف الهی
 المنه لله تقدس و تعالی
 هپ امته ای نور خدا بورج دکلی
 ایتمک او شهک لازمه شکرینی اجرا

از جمله بو بیوایه بی اول خسرو عالم
 باشند ایانغه ایلدی مستغرق آلاء
 شکرانه الطافه بدل اول شه دینک
 فرض اولدی دعاسی بکا لیل و نهارا
 اما که بو عاجز کی آشفته هوانک
 یوقدر یوزی حقیله بو بورجی ایده ایفا
 بو جرأتمه اولدی سبب اشته بو حالت
 احسانک ایدرمی بنی حرمانزده حاشا
 سن رحمت فیاض خداوند ازلسین
 فیض نظرکدر ابدی مقصد اقصا

بیان لازم التقدیم

نور مبین مولا ، اولین فیض تجلا علیه افضل التحیا
 افندمزک نهانخانه رحمته روان و تعیر دیکرله دیده
 ظاهر بنیاندن نهان اولمزدن اول جمال ملکوت آرای

خدا پسندیده روشن نظر هدایت اولان بختیاران
 از لیلک «من رأنی دخل الجنة» حدیث بشارت احتواسی
 وجهله شرفیاب نعمتسرای جنات و «لا تمس النار
 مسلماً رأنی» خبر صحیحنک دلالت قطعیه سی وجهله
 آتش دوزخدن مظهر نجات اوله جقلری کی عالم
 معناده و حالت بیداریده مشاهده دیدار قدسیت
 آثار یله تنویر باصره بصیرت ایدنلرکده آنلره یقین
 بر مرتبه سلامت پرورانه ده فائز فوز و سعادت
 اوله جقلرینه «من رأنی فقد رأنی حقاً فان الشیطان لا یتثل بی»
 حدیث شریفی دلالت ایلدیکی اتفاق حفاظ و محدثین
 و شهادت کمل عارفین ایلله رهین درجه ثبوتدر .

بختیاردر ، او مؤمن پاک اعتقاد که آینه جمال الله
 افندمزک مشاهده دیدار کونین پیراسیله قریرالین
 فوز و نجات اوله . تبریک و تسعیده شایسته در ،
 او بختیار که بویله بر تجلی حیات انجامه نائلیت ایچون

استعداد و قابلیت بوله . اوت ! اويله بر مرد کامل ،
هم بختيار همده تبریکه سزاواردر . زیرا بوسعادت
سرمدیه ، فضل مین الهی اولقله برابر شریعت غرای
احمدیه به توسل . تزکیه اخلاق . تصفیه درون . محبت
رسول الله رسوخ و ثبات وامثالی کبی ملکات
و کمالاته وابسته در هله بوبابده محبت رسول ،
اصل الاصولدر . بلکه محبت خصوصنده کمال تحققه
احتیاج واردر . ارتق بویه بر فضل واحسان الهی ايله
ممتاز و مختار و بواوصاف سعادت اتصاف ايله پیرایه دار
اولان انسان ، نصل تقدیس و تسعیده شایان اولسون .

محققدر که هر مؤمن روشندل : اويله بر سعادت
عظمایه نائل اولمق ایستر واسباب و وسائلنده تشبث
فکرینه دوشر حالبو که بو مثللو مقاصد جلیله و وصولدن
محرومیت ، اکثر یا اصول توسل و تشبته عدم وقوف
وعرفان و یا امکان حصول مقصد امرنده نقصان

اطمئناندن نشأت ایده کلدیکی مجرب اولمسيله بو نقطه
نظر دن جمال رسول کبریا افندمرك امکان شهودی
حقنده اعلام علمای دین مین و روشنظران صدق
و یقین انارالله براهینهم الی یوم الدین حضراتنک بسط
و بیان ایلدکلری شواهد و دلائل اطمئنان آورانه بی
و بوسعادت علیایه وصول ایچون تشبث و توسل اولنمی
لازم کلان و سائل موفقیت پرورانه بی جامع اولان
آثار بر کزیده بی مطالعه به لزوم حقیقی ترتب ایدر ،
تا که صورت مقصدک جاوه پیرای آینه حصول
اوله جفنه یقین و اطمئنان و کیفیت توجه و توسله علم
وعرفان حاصل اوله انجق بو مقصد جلیل بی عدیله دائر
جلال الدین السیوطی و امام الحافظ ابو بکر احمد بن
الحسین البیهقی و علامه احمد بن طاهر بن محمد القزوی
والشیخ ابو عبدالله محمد بن موسی النعمان و محمد بن
الابراهیم الحلبي قدس الله اسررهم حضراتی کبی کبرای

دین و عرفای اهل یقینک کتب و توالیف عدیده سی
 هپ عربی اولقله برابر نسخه لری ده نادر و کمیاب اولوب
 بونلردن اقتباس نور علم و ایقان ، یالکیز لسان بلاغت
 عنوان عربی یه واقف و بونسخه لره مالک و متصرف
 اولنلره انحصار ایتمش اولدیغندن هم کندی می بهره مند
 اطمئنان و انتباه همده تماشای جمال جمیل محمدی یه مشتاق
 اولوب لسان عربی یه واقف اولیان دین قرنداشلری می
 ان شاء الله الرحمن نتیجه بخش حصول و مرام اوله جق
 و سائلدن خیر و آگاه ایتمک اوزره توالیف جلیله
 مذکورده دن برینک لسان عذب الیسان عثمانی یه نقل
 و ترجمه سیله برابر طبع و تمثیلی ارزوسنه دوشدم
 و مددکاری توفیق الهی ایله بونلرک برقاچنک
 نسخه سنی اله کچوروب نظر مطالعه دن کچوردم حقا که
 هر بری امکان رؤیت رسول الله علیه صلواة الاله
 حقنده حکمت آرای صدور اولان احادیث سنیه

سید المرسلینی و اولبابده کی دلائل و شواهد علما
 و عارفینی جامع و بومسئله مقدسه ده افسرده دلان
 طبیعت و کوتهنظران حقیقتک وقوعه کلش اولان انکار
 و اعتراضلرینه قارشو دخی برر سیف قاطع اولوب
 شوقدرکه مرشد حقیقت آگاه عارف بالله شیخ اسماعیل
 نواب نفعنا الله به حضر تلرینک (هدیه الرشیدیة فی الاجتماع
 بسید البریه والتوجه الی النفس القدسیه) عنوانیله تألیف
 ایدوب محرر بمقداره ارسال ایلدیکی رساله امام سیوطی
 قدس الله سره و امثالی کمل اولیاء اللهک تألیف لرنده کی ادله
 و براهینه مرآت انکشاف و نور بصیرتدن محروم اولان
 منکرین و معاندینک سواد شکوک و اعتراضاتندن پاک
 و صاف اولقله برابر دیگر بعض فوائد عظیمه بی ده متضمن
 اولدیغندن انک ترجمه سی حالنده توالیف جلیله مذکورده نک
 کافه سی ترجمه ایدلش دینک اوله جنی حیثیله عجز و نقصانی
 معترف و فضل و توفیق الهی دن معترف اولدیغم حالده

رسالة مباحث عن ابي بالترجمة فيوضات قدسية محمدية نك
 فيضانه نعم الفال اولمق حيثيله مطلع الانوار توفيقات كردكار
 وبومثللو آثار منوره دينيه به تجليگاه انتشار اولان عصر
 همايون كمالات مشحون حضرت خلافتناهي به يادكار
 ايلدم وما توفيقى الا بالله

(محمود بك) مطبعه سى

باب على جوارنده ابوالسعود جاده سنده نومرو ٧٢

١٣١١


وتقدس حضرتلرینک ذات الہیسی علویت تنہای نا پذیر ایله
تزهیرور اعتلا و عظمت اسماء سبحانیہ و جلالت صفات ربانیہ سی
افراد بشردن کیمسه ایچون مطمع نظر احاطه اوله میسه جق
درجہ ده متعظم وبالادر .

توصیف اسماء و صفات الہیہ سننده السن و افہام کائنات ،
کلیل وقاصر وراسخدم علم و کلام اولئر دخی نائل مقصد و مرام
اولمقدن اظہار عجز ایله صدیق اکبر رضی اللہ عنہک « الْعَجْزُ عَنْ دَرِّكَ
الْاَدْرَاكِ اَدْرَاكِ » قول حقیقت بیانی قائل اوله رق جملہ سی وادی
بہت و حیرتہ دائر و سائر در .

اسماء حسنا و صفات علیای ربانیہ سنندن بریدہ صفت بدیہ
علمدرکہ بوندن بر ذرہ سنی « وَلَقَدْ كَرَّمْنَا بَنِي آدَمَ » تبشیر الہیسی
وجہلہ تکریم و تشریف ایتدیکی نوع بشرہ تقسیم بیوردی .

بو ذرہ عامدن انسانلرک هر صنفی هر بر عصرده عقللرہ
حیرت و یردجک و بر چوق شعبہ و قسملر د انقسام و انبساطی حسبیله
حصر و ضبطنه امکان بولنه میسه جق درجہ ده درلودرلو علملرہ
نائل اولدی و صنوف بشردن هر صنفہ حکمت ربانیہ سنک اقتضا
ایتدیکی صورتده تقسیم و تخصیص ایلدیکی علمدن صنف دیگرک
حرمان و انکاردن غیری نصیب و بہرہ سی اولمدیغی حالده
هر صنفی احسان و عطا بیوردیغی علمہ قانع و راضی قیادی .

جناب واجب الوجودی تسبیح و تقدیس ایلرم کہ قوللرینک
ارالریغی عقلاً و علماً متساوی قیام اقلہ برابر جملہ سی بولندقلری
طبقات متفاوتہ کی حال و شانلرندن خشنود و ارضا بیورمشدر .



بسم الله الرحمن الرحيم

حمد و ثنای بی پایان ، باری تعالی و تقدس حضرتلرینک بارکاه
عظمت والوہیتہ شایاندرکہ محض احسان والہام الہیسی اولان
علوم لدنیہ و معارف سنیہ بی امت مرحومہ محمدیہ یہ تخصیص
ایلدی و بو سعادت مند ان ازلی یہ « وَمَنْ يُؤْتِ الْحِكْمَةَ فَقَدْ اُوْتِيَ خَيْرًا
كَثِيرًا » حقیقت نظریہ و عملیہ سنندن بہرہ دار سعادت و بعضی
بعضسنہ دستدادہ مظاهر ت اولان عاماء راسخین و حکماء کاملین
ایله مدد و عنایت بیوردی . و یوز بیکلر جہ صلاۃ و سلام ، ایکی
جهان کونشی . تبی ہاشمی قرشی . نور تجلیخانہ لی مع اللہ .
حبیب ادیب کبریا محمد رسول اللہ صلی اللہ علیہ وسلم افند مزہ
شایستہ اهدادرکہ نور فیاض ارشادی ، امت مرحومہ سنی سرا
پردہ حرمخانہ توحیدہ ایصال ایچون سراج منیر ہدایت اولدی .
و تحیات رحمت انجم ، آل سعادت مال و اسحاب قدسیت اشمالہ
ارزان اولسون کہ ہربری حکم و اسرار نبویہ سنندن نشوہ یاب
فوز کیر اولدیغی حالده حکمت آموز افراد امت اولمق مزیت
فاخرہ رحمتپوریلہ امتیاز عظیم بولدی .

اما بعد . معلوم روشند لان ایمان و عرفاندرکہ اللہ تعالی

بنی آدمک هپسنگ بحربی پایان علم آلهیسندن نائل اولدقلری
شیء ، فیضیاب تعالیم صمدانی حضرت خضر علیه السلامک کلیم الله
موسی علیه السلامه خطاباً « مَا نَقَّصَ عِلْمِي وَعِلْمُكَ مِنْ عِلْمِ اللَّهِ
إِلَّا كَمَا نَقَّصَ مِنْقَارُ الْعَصْفُورِ مِنَ الْبَحْرِ » یعنی یانجی الله ، بنم عاممله
سنک علمک علم الهی به نسبتله سرچه نک غاغه سیاه دکنزدن
اکستدیکی صوقدردر . دیدیکی سوزک ماصدقیدر .

جناب علیم لایزالک انبیاء کرام ورسل عظامنه وانلرک اتباع
واجب الاحترامنه وخصوصیه مظهر وحی خدا محمد مصطفی
صلی الله علیه وسلم افندمزه وطریق سلامت انجام نبویسنه تابع
اولان علماء راسخین وحکماء کاملینه تقسیم واحسان بیوردینی
علم ، اعظم تقاسیم آلهیهسندن اولمسیه بو پیرایه داران سعادت
ازلیه نک هربری علم ودانشدن وسعت وقابلیت فطریه لرینه
نسبتله درجات متفاوته اوزردبه ره عرفان وکمال بولدی . بو حیثیتله
انلردن بر طائفه نک مجلای اختصاص اولدینی احوال عظیمه
واسرار فحیمه طائفه دیگرک آینه استعدادلرنده جلوه پیرای
انکشاف اولمدی ، بلکه حضرت موسی وخضر علیهما السلامک
اردلرنده حکمت آرای وقوع اولان تباین حقیقت آموزقیلندن
اولمق اوزره بعض کره هر طائفه دیگرینک احوال واسرارینی
قبول وتصدیقده صورت نمای اختلاف اولدی . مع هذا بو اختلاف
وانکار ، هر ایکی طائفه نک جلالت قدر وشاننه منافی وهر ایکی
طرفک رأی ودعواسندن برینک ضعف وبطلانی مقتضی دکلدر .

کورر سین که هر بر عصر اهالیسی مذهبلی متحد ومشر بلی
یکدیگرندن غیر متباعد اولدینی حالدده احوال علیه ومعارف سنیه
مبحوئه دن نائل اولدقلری شیده کندیلرینی مستقل کوردکلرندن
طولانی اندن اولکی عصر اهالیسنک اوشیئه نائایتلرینی انکار
واستبعاد ایدرلر . مع هذا حقیقت حالدده انلرده او مذهب ومشر ب
اصحابندرلر . بلکه بر عصر ایچنده دیار مختلفه ده دهاطوغریسی
بر مملکت ایچنده علوم متفاوته ومختلفه بولورسین بلکه بر مذهب
ومشر بده بولسان ایکی شخصه معارف وعلومده متفق اولمق
اوزره پک آز مصادف اولورسین . بو تفاوت واختلاف . وسعت
علم سبحانی وبدیع فعل یزدانیسنه آیت وبرهاندر ، سبحانه
ما اعظم شانہ .

﴿ شعر ﴾

وعلى تفنن واصفيه بوصفه يفنى الزمان وفيه ما لم يوصف

معنای حقیقت احتواسی : جناب بدیع مطاقک واصفان
عظمت وشان وثنا گذاران کلمات بی پایانی وصف وثنای آلهیسنده
درلو درلو الفاظ بدیعه المعانی ایله صحائفطراز تعظیم والسنه پیرای
تقدیس اولدقلری حالدده زمان بتوب توکنور ووسبتون فنا بولورده
ینه ذات وصفات اقدسنده وصف اولندق لاتعد ولا تحصى جلالت
وکالات باقی ذایر ، ذیمکدر .

ایمدی هر صاحب درایت و انصاف. خیرایله مشهور و معروف
اولان قرون ماضیه نك اقوال و احوالی در پیش نظر تأمل
ایدرسه شو ذکر و بیان ایتدیکم حقیقه شواهد صدق و صواب
بولور .

حقیقت کوی سرائر دین مبین علیه صلوات المعین افندمن
« ان من العلم كهیئة المكنون لا یعرفه الا العلماء بالله فاذا
ذکر وه انکره اهل الغرة بالله » بیورمشدرکه خلاصه مال

منیفی ، تحقیق عالمردن کیزلی بر علم جایل واردزکه انجق عرفان
پرور حق یعنی الله تعالی حضرت تلرینی بیلمکه موفق اولنر بیلیر ،
انلر او علم مکنونی ذکر و بیان ایتدکلری وقتده باری تعالی
و تقدس حضرت تلرندن غافل اولنلر رد و انکار ایدر ، دیمکدر .

ابوهریره رضی الله عنه دخی « اخذت من رسول الله

صلی الله علیه وسلم وعائین من العلم اما الوعاء الاول فبثته
فیکم واما الوعاء الثاني فلو بثته لقطع منی هذا البعوم »

دیمشدرکه مفهوم عالیمی : رسول اکرم صلی الله علیه وسلم
افندمزدن ایکی یوک علم آلام . برنجی یوکنی ایچکزده یایدم .
ایکنجی یوکنی نشر ایتمش اولسه یدم نیم شو بوغازم کیلورایدی .

علی ابن الحسین رضی الله عنهما حضرت تلریده « یارب

جوهر علم لو ابوح به = لقیل لی انت ممن یعبد الوثنا
بیورمشدرکه منطوق منیفی : نیجه جوهر علم واردزکه اگر
آنی فاش و اظهار ایتمش اولسه بکا « سن بته طابانلردن سین »
دینلور ایدی . دیمکدر .

ایمدی هادی مطلق جلّت عظمته حضرت تلرینک بوامت
عالیه احمدیه به احسان بیوردینی نعمت لک اعظم لرندن بریده علم
تصوف و طریقت صوفیه درکه بو علم و طریقت ، حضرات قدسیه
و مقامات انسیه به واسطه و صائدر نته کیم حجة الاسلام ابو حامد
الغزالی رضی الله عنه الباری « المنقذ من الضلال » عنوانلی کتابنده
دیورکه : بن وقتا که علوم آلیه و عالیه دن فراغت ایلدم ، همت
کلیه مله طریق صوفیه به یونلدم بو طریقده سلو کمدن صکره علم الیقین
بیلدم که ، اصل سالك طریق حق اولنلر ، صوفیه کرامدر .
زیرا انلرک سیرتی ، سیرت لک کوزلی . طریق قلی ، طرق
سعادتك احسن و افضلی . خویلدی ده اخلاق حسنه نك از کی
وا کملیدر . بلکه عقلانک عقل و همتی ، حکمانک فکر و حکمتی ،
سرائر شناسان شرع متین اولان علمانک علم و معرفتی ، صوفیه نك
سیر و اخلاقندن برشیئی اندن دها خیر لیسنه تبدیل و تغیر ایچون
اجتماع و اتقائ ایتمش اولسه بوکا امکان بولنه مازایدی . ایشته
صوفیه کرام عدو احصایه کلمز مشربلرده بولنمقله برابر اساس
مقصود لرینی تصفیه بواطنه و تطهیر سرائره بنا یعنی باطن لرینی
هر درلو فنا خویلدن تمیز لکه ، قابلرینی تعلقات شهوانیه دن

ساده لشیر مکہ اعتنا ایلدیلر . نته کیم سیدالوجود صلی الله علیه
وسلم افدمز « ان فی الجسد مضغة اذا صلحت صلح الجسد

کله واذا فسدت فسد الجسد کله الا وهی القلب »

بیور مشدر که معنای حکمت احتواسی: جسد انسانیده برات پارچه سی
واردر؛ او ات پارچه سی صالح اولدینی وقتده جسدک هپسی
صالح اولور؛ فاسد اولدینی وقتده سرپای جسد فساد بولور؛
آگاه اولک که اوات پارچه سی قلب انسانیدر . دیمک اولدیغنه
نظر آصوفیه حضراتی بو حدیث شریفک حکم جلیانی دستور العمل
اتخاذ ایتدیلر و همت کلیه لرینی حق سبحانه و تعالی حضرت تدرینه
حصر و تعلیق ایله نظر میل و رغبت لرینی غیر الله بدن قالدیردیلر
و طریق لرینی ذکر، فکر، آزیملک، آز او یومق، آرسو یلمک،
خالق بدن چکنمک کبی مبانی سلامت معانی اوزرینه تأسیس
قیلدیلر. مشارالیه بوضو رتله منتهای همت لرینی ماسوادن قالدیروب
باری تعالی و تقدس حضرت تدرینه حصر ایدنجه جناب عالم السر
والخفیات حضرت تدریده آنلری هر کسدن زیاده بوصفت علیه
علمیه دن بهره مند عرفان ایلدی و علوم شریفه دن کندی صفات
ربانیه و اسماء سنیه سنه تعلق ایدن علمه مظهر و مطاع قیلدی .
و وراثت علوم انبیا و مرسانینی کنیدیلرینه تخصیص قیلوب عجائب
اسرار ملک و ملکوتندن تحت حصره داخل اوله میه جق شیری
کنیدیلرینه کوستردی .

﴿ افاده مخصوصه ﴾

وقتاکه جناب رب منان بومستمند ضعیفی . انسان عین
وجود . امام عرفان پروران کشف و شهود تلمیذ امام ربانی
قطب محقق رحمانی شیخ کاهلم سیدم ابراهیم الرشید قدس الله
سره حضرتلرینک شرف صحبت و ملاقاتیله منتدار احسان
بیوردی . مشارالیهک هر ممکن اولان شیده سنت جلیله
رسالتپناهی یه اتباعی حیثیتیه اخلاقی ، اخلاق جلیله مصطفی
وسیرتی سیرت اصحاب توحید و صفا بولدم . طریقنی ده طریقه
سادات شاذلیه اولمق اوزره تاقی ایلدم . آنجق کنیدی
طریقت مسلوکه سنی مرشد کامل و مکملی قطب دائرة تقدیس
سید احمد ابن ادریس رضی الله عنه نسبتله طریقت احمدیه
تسمیه ایدردی . زیرا هادی کل صلی الله علیه وسلم افدمز
سید احمد ابن ادریس قدس الله سره النفیس حضرتلرینی اذکار
مخصوصه ایله فیضیاب اختصاص و امتیاز بیورمیش و اذکار
مذکورره ایله دعوت الی الله مأمور و مأذون ایتمش ایدی
واحزاب شریفه کبی مثلی سبق ایتماش بر نعمت عظیمه ایله
بهره دار سعادت قیلمشده که احزاب مذکور دنک عظمت شانی
تقدیر ایچون الفاظ و معانیسنک تأمل و تفکری و آنی حضور
قلب ایله تلاوت ایدنلر ایچون آتیده ذکر ایده جکمز صلاة
عظیمیه نک اشارتی وجهله مجلای تجلی خدا رسول الله صلی الله
علیه افدمزله شرف اجتماع و ملاقاتک تیسری کفایت ایدر .

﴿ فاتحه مقصود ﴾

نور عين وجود وباعث ايجاد هر موجود . حبيب اديب
آلهی صلی الله علیه وسلم افدمزك جمال جیلنی او یقوده
اویانقاده کورمه موقق اولمق هر مؤمن ایچون اك بیوک
سعادتلدن اولدینی حالده اکثر دیارده بوسعادت ابدیه نائل
وبلكه یا عدم وقوف و عرفان و یا خود انکار افسرده دلان
مانعه سیله بوشهود نجات انجارك وسائل مغویه حصوله متوسل
ومائل اولان بختیاران پك آز اولمقاه برابر مرأت جمال حق
افدمزك حالت یقظه ده کوریه بیاهجکی مسئله سنده عقول فحول
بیله برنوع استبعاد وانکار شائبه سندن مصون اولدیغنی کورنجه
شیخم رضی الله عنہک رؤیت سید اعظم صلی الله علیه وسلمه
متعلق اولان سوزلرندن بر نبذه سنك جمع وتلفیق ارزوسنه
دوشدم . تا که طالب حق و یقین اولنلره اولبابده کی دلائل
قویه ظاهر و نمایان اوله ومنصف اولان منکرلرک انکار
وعنادی ومستبعدلرک استبعادی زوال بوله ، امید ایلم که بووسیله
ایله خدمه طریقت علیه سندن صاییلورم وزمره خواص محینی
اره سنده محشور اولورم اوارزونك نتیجه فعلیه سی اولمق
اوزره بورساله بی تحریر وترقیم و « الهدیه الرشیدیه فی الاجتماع
بسید البریه والتوجه الى النفس القدسیه علی صاحبها الصلاة
والتحیه » نامیه بالتوسیم اوچ باب وبرخاتمه یه تقسیم ایلدم .

﴿ باب اول ﴾

باعث آفرینش عالم صلی الله علیه وسلم افدمزك مشاهدہ
جمال باکمال رسالتینا هیلرینك احادیث نبویه واقوال مشاهیر
سادات صوفیه دلالتیله عقلاً ونقلاً امکان حصولنی وسادات
مشار الیهمدن اکثریسنك بوسعادتہ کیفیت اقتران ووصولنی
متضمندر .

بوسعادت سرمدیه نك عقلاً حصولی بختنه کلنجه هرکس
کندی نفسندن بیلور وهر عاقل اعمال فکر ایتدیکی حالده تعقل
ایدرکه انسان برشیئی زیاده تذکر و تصور ایدنجه وخصوصیه
محبت فوق العاده ایله سونجه تماشاگاه روح روانی اولان عالم
رؤیاده بهمه حال کورر . زیرا محبتك قوه واهمه اوزرینه قدرت
قاهره وقوت عظیمه باهره سی واردر . حتی مرویدرکه بر آدم
اولیاء اللهدن برذاتك حضورینه کلوب مظهر جمال مولا علیه
افضل التحایا افدمزی رؤیاده کورمك ایستدیکی حالده موقق
اوله مدیغندن بختله شکایت وطلب همت ایلدی اوزات « بوکیجه
طوزلی بالق اکل ایله . لکن اوزرینه صو ایچمه » جوانبی
ویردی . او آدمده اویله یایدی . صباح اولنجه ولی مشار الیه
او آدمه : « بوکیجه نه لر کوردك ؟ » دیه صوردی . « برچوق
صوبارداقلری ، چاپار ، صولر کوردم . » جوانبی الدی .
« بویله شیلری هرکیجه کوررمی ایدك ؟ » سؤالنی ایراد ایدوب

اوده « خير ! يالكز بوكيجه كوردم . زیرا طوزلی بالقدن زیاده
صوصامش ایدم . » دینجه « ای قرداشم ! اکر ماء الحیاءه جمال
رسول الله تشنه لب حسرت اولمش یعنی صوصامش اولسه ایدک
البتّه آنیده کورردک ! » خطابیله نور خلوتخانه یزدانی صلی الله
علیه وسلم افدمزک مشاهده دیدار فیض آثاری کندیسنه زیاده
محبتّه واشتیاق و حسرتّه متوقف اولدیغنی اکلاتدی . ایشته بویله
بر محبت تعاضم و ترقی ایدنجه محب صادق، نظر ظاهر بینندن نهان
اولان سوکیلیسنی باش کوزیله کوررجه سنه دائمی پیش نظر
خیالنده تجسم ایش کورر نته کیم بوحال تواتر طریقله بعض
عشاقدن مرویدر و بن بر ترزی بیایر مکه عاشق ایدی سوزینه
اعتماد ایتدیکم ارقداشی بکا حکایه ایتدی که کندیسنی اجرای
صنعت ایدرکن بیله سوکیلیسنی ایکنه سنک دلیکنده کورردی
ارتق تأمل ایتکه فیض محبت نه بیوک بر سر حکمتدر .

روشن نظر جمال محمدی اولمق امکانک نقلاً ثبوتنه دلیل
و برهان دخی سیدالوجود صلی الله علیه وسلم افدمزک « هر کیم
بنی رؤیاده کوررسه حقیقتده کورمش اولور . زیرا شیطان
بنم صورتمه کیره مز » مضموتی متضمن اولان « من رأی فقد

رأی حقاً فان الشیطان لا یتثل بی » قول حقیقت مألیدر .

برده صحیح بخاری و مسلمده و سنن ابی داودده ابو هریره
رضی الله عنهدن روایة صحیفه زیب سطور اولوب « هر کیم بنی

عالم منامده کوررسه البتّه حالت یقظهده کوره جکدر » تبشیر
عالیسنی حاوی اولان « من رأی فی المنام فسیرانی فی یقظه »
حدیث حکمت اشمالیدر .

بومبحث عالیده جلال الدین السیوطی علیه الرحمة
« تنویر الحاک فی اثبات رؤیة اثبی والمالک » نامیله بر رساله
مستقله سی اولدیغندن مقصود مزنی تأییداً رساله مبجوتنه
بعض مباحثی بر وجه زیر آرایش صحیفه اعتبار ایلدک .

مؤلف مشار الیه رساله مذکورده سنده رؤیت سعادت
انجام نبوی حقنده اوزون اوزادی یه ایراد دلائل ایتدکدن صکره
بیوررکه صحابه کرامدن برندن (ظن ایدر مکه ابن عباس
رضی الله عنهما حضرتلرندن) مرویدر که کندیسنی آینه جمال
حق صلی الله علیه وسلم افدمزنی عالم منامده مشاهده ایدنجه —
« من رأی فی المنام فسیرانی فی یقظه » حدیث شریفنی تخطر

مایدرک حبیب کبریا علیه افضل التحایا افدمزک اویقوده کورلیدیکی
کی اویانقاقدده نصل کور یله بیله جکنی دوشونمکه باشدی .
بوتفکرله ازواج طاهراتدن تیزدسی میمونه رضی الله عنهانک
حرمسرای عصمتته کلوب کیفیت رؤیایی و کندی تفکر
وملاحظه سنی حکایه ایلدی . در حال عصمتپناه مشارالیه ایاغه
قالقه رق صلی الله علیه وسلم افدمزک استعمال بیوردیغنی آینه بنی
ابن عباس رضی الله عنهمانک دست تعظیمنه ویردی . مشارالیه

دیشکه: وقتا که مرآت جلیل محمدی به نظر صالدم صفحه تابناکنده
جمال با کمال رسالتپناهی بی مشاهده ایدوب کندی نفسمک
صورتی کوره مدم . اتھی .

وینه رساله مبحوئده شیخ صفی الدین ابن ابی منصورک
رساله سندن وعیف الدین الیافینک روض الریا حینندن نقلاً
مذکوردرکه شیوخ عارفینک مقتداسی واهل زمانک برکت
فیض احتواسی ابو عبدالله القرشی حکایه ایتشددرکه: دیار مصریه ده
غلاء کبیر تأثر بخش کبیر وصغیر اولنجبه بارگاه کبریا پناه
ارحم الراحمین ووجه دار اضرع و نیاز اولدم، بکاهاتفدن ندا اولندیکه:
یهوده یالوارمه، بو باده سزدن هیچ بریکزک دعاسی مقبول
الهی اولماز . انک اوزرینه شام شریفه سفر ایلدم . وقتا که خلیل
رب رحیم جناب ابراهیم علیه السلامک روضه مقدسه سنه یقین
بر محله واردم . جناب خلیل علی نبینا وعلیه صلوٰۃ الجلیل بنی
قارشولدی . دیدم که: « یارسول الله ، نعمتسرای الطافکده
بکا ویره جکک ضیافنه بدل اهل مصره دعا بیور . » بونیازمک
اوزرینه اهل مصره دعا خوان اولدی . جناب مجیب السائلین
بودعا برکتیه دیار مصردن بلاء قحط و غلابی دفع ایلدی . یافعی
رحمة الله علیه رساله سنده بوقصه محققه بی بسط ایلدکن صکره
دیورکه: شیخ کبیر مشارالیهک « خلیل علیه السلام بنی قارشولدی »
سوزی ، قول حقدر . بوسوزی انجق انبیاء عظام علیهم السلام
واولیاء کرامه تجلی نما اولان احوالک حقیقت وماهیتنی عارف
اولان از بابی بیلور . که مشارالیهم حضراتی و احوال ایچنده

مستغرق ایکن . ملکوت سماوات وارضینی مشاهده ایدرلر .
وانبیاء عظامی ذی حیات و غیر اموات اولدقلری حالده کوررلر .
نته کیم اعتلا پیرای مقام اودانی علیه افضل التحایا اقدامز ،
لیله مقدسه معراجده حضرت موسی علیه السلامی روی زمینده
ساحه نشین حیات کورمش ایکن مؤخرآ عوالم علویه ده کړک
اونبی ذیشانی وکړک انبیای عظامدن برجماعت فیض افشانی
مشاهده بیوروب انلره مخاطباتده بولنشددر ،

انبیای عظامدن معجزه اوله رق صدوری جائز اولان احوال
وافعالک عدم تحدی شرطیه اولیاء کرامدن کرامت اوله رق
ظهورینک جوازی ایسه شرعاً مقرر و مثبتدر .

شیخ سراج الدین ابن الملتن قدس الله سره طبقات اولیاسنده
غوث اعظم عبدالقادر الکیلانی رضی الله عنهدن روایه دیورکه:
مرشد حقائق آموز عالم صلی الله علیه وسلم اقدامز اولیه نمازنی
ادا ایتزدن اول کوردم . بکابیوردی که: ای اوغایجغزم ، نیچون
دهنکشای نصیح وارشاد اولمیورسین؟ جواباً دیدم که یارسول الله،
بن کوچک بر آدمم . فصحاء بغداد قارشی فصل اغزاچوب بحث
وتکلم ایده بیلورم . انک اوزرینه « آغزیکی آج » بیوردی . بنده
آچدم . یدی دفعه اغزیمک ایچنه کلاب افشان نفیحه فیض
اولدقدن صکره ناسه اجرای پند ونصیحت وانلری رب کریمک
یولنه حکمتله و موعظه حسنه ایله دعوت ایت دیدی . بنده نمازی ادا
ایتدکن صکره موقع وعظه اوتوردم . بر چوق خلق اطرافی
آلدی . لکن بکا سوز سویلیه میه جک صورتده طوتقوانق کادی .

بو حالت بهت و حیرتده ایکن حضرت علی رضی الله عنہی مسجد شریف ایچنده قارشومده قائم کوردم . بکا دیدی که : « ای اوغلم ، نیچون سوز سویامیورسین ؟ » جواباً : « ای پدر عالیقدرم ، بکا بهت و حیرت عارض اولدی » دینجه اغزیمی اچقماغمی امر ایدوب امری موجبجه آچدم . الی کره اوفوردی . « نیچون یدنجی به اکال بیورمدیکز ؟ » دیدم . « رسول الله صلی الله علیه وسلم افندمزدن تأدباً اکال ایتدم » دیو کوزیمک او کندن نهان اولدی در حال لسانمه طلاق کلوب :

« غواص الفکر یغوص فی بحر القلب علی درر المعارف »

فیستخرجها الی ساحل الصدر فینادی علیها سمسار ترجمان

اللسان فتشتري بنفائس اثمان حسن الطاعة فی بیوت اذن الله

ان ترفع » یعنی غواص فکر انسانی کوکل دریاسنده کی درر

معارف اوزرینه طالب انلری ساحل صدره چیقارر سمسار ترجمان لسانده صاتمق ایچون ندایه باشلار . او معرفت اینجولری

ایسه « فی بیوت اذن الله ان ترفع ویدکر فیها اسمه »

سر جایلمه مظهر اولان عبادتخانه لرده قزانیلان نفائس اثمان حسن طاعتله صاتون الله بیلور . « مقدمه سیله دهنکشای وعظ

وارشاد اولمغه بسمله خوان شروع اولدم . انتهى

ینه مذکور طبقات اولیاده شیخ خلیفه ابن موسی رضی الله عنہک ترجمه حالنده مسطوردرکه مشار الیه شیخ خایفه اویقوسنده اویانقاغنده رسول الله صلی الله علیه وسلم افندمزی چوق کورردی . حتی مشار الیهک اکثر افعالی یا حالت یقظهده ویا حال نومده صلی الله علیه وسلم افندمزدن تلقی ایتدیکی اوامر جلیلهیه مبتنی ایمش . برکیجه ایچنده یکر می یدی دفعه قریبالعین جمال جمیل محمدی اولوب بونلردن برنده رحمة لاملاین افندمزدن اکا دیدی که : « یا خایفه بندن مضطرب و منزعج اولمه که اولیادن نیجهلری حسرت رؤیتله ترک حیات ایلدیلر . »

﴿ تضرع و تحسر ﴾

جماک مطلع نور خدادار یار رسول الله

جینک صبح فیاض هدادر یار رسول الله

سنی کورمک قدر دولت اولور می اهل ایمانه

بود دولت ، دولت هر دوسرادر یار رسول الله

شهود لم یزلدر رؤیت دیدار رخشانک

یوزک نور بدیع کبریادر یار رسول الله

کمال اموی دخی « الطالع السعید » نام کتابنده ابی یحیی ابن

الشافعینک اصحابندن اخیمده مقیم بولنان شیخ الصفی ابی عبدالله

محمد ابن یحیی الاسوانی نک ترجمه حالنده بو ذاتک صلاح حال الیه

شهرتتی و مکاشفات و کراماته مظهریتتی بیانندن و ابن دقیق المعید

وابن النعمان وقطب قسطلانی کبی مشاہیر کرامک مشارالہدن کتابت حدیث ایلدکلرینی درمیانندن صکرہ شیخ مشارالہک مظهر جمال حق صلی اللہ علیہ وسلم اقدمزک دیدار مبارکینی مشاہدہ ایلہ روشن نظر فیوضات وعلیہ الصلاة والسلام اقدمزہ شرفیاب صحبت وملاقات اولمقدمہ بولندیغنی ذکر و افادہ ایلدیکنی درج وحکایہ ایلمشدر : شیخ عبدالغفار ابن نوح القوصی . کتاب توحیدندہ بیان ایلدیکہ مشارالہ ابو عبد اللہ الاسوانی خبر ویرر ایمش کہ کنیدیسی ہر ساعتہ سیدالوجود صلی اللہ علیہ وسلم اقدمزی کورر وحتى اعرف الانبیا اقدمزدن ہر ساعت اقتباس ایلدیکی انوار علومدن یانندہ بولنانلری بہرہ دار عرفان ایلر ایدی ینہ مذکور کتاب توحیددہ مسطور در کہ شیخ ابوالعباس المرسی قدس اللہ سرہ الانور صلی اللہ علیہ وسلم اقدمزہ وصلت دائمہ یہ مظهر ایدی . سلام و یردیکی وقندہ فخر کائنات اقدمز اعادہ سلام و کنیدیسیلہ تعاطی کلام بیورر ایدی .

شیخ تاج الدین ابن عطاء اللہ الاسکندرانی نفعا اللہ بہ لطائف المنندہ ذکر ایلدیکہ : بر آدم شیخ ابوالعباس المرسی حضرت تلرینک یاننہ کلوب ، ای عارف کامل بنملہ شو الکزلہ مصافحہ بیوریکز زیرا سز بر چوق یرلر کزوب بر چوق رجال اللہ ایلہ کورشدیکز دینجہ « واللہ بوالملہ رسول اللہ علیہ الصلاة والسلام اقدمزک غیریسیلہ مصافحہ ایتدم » جوابی ویرمشدر . وینہ عارف مشارالہ دیمشدر کہ اگر حبیب کبریا علیہ افضل التحایا اقدمزک جمال با کمالی بر لحظہ کور مامش اولسہم کنیدیسی مسلمیندن صایماز ایدم . انتہی

شیخ صفی الدین ابن ابی منصور کندی رسالہ سندہ و شیخ عبدالغفار دخی کتاب توحیدندہ یازمشدر در کہ شیخ ابوالعباس الطنجی قدس سرہ شیخ ابی الحسنہ خبر ویرمش کہ طریقت جلیلہ صوفیہ یہ سلوک ایچون وقتا کہ غوث اعظم احمد الرفاعی قدس اللہ سرہ السامی حضرت تلرینک حضور فیضا فیض عرفانہ کلدیم . مشارالہ « بن سنک شیخک دکلیم . شیخک » قنا « دینلان محلدہ ساکن عبدالرحیمدر . اورایہ کیت . » امرینی ویردی . همان محل مذکورہ سفر ایتدم و شیخ عبدالرحیم حضرت تلرینک یاننہ کیردم . مشارالہ بنی کورنجه : « رسول اللہ علیہ الصلاة والسلام اقدمزی معرفت تامہ ایلہ بیلدکمی ؟ » دیہ صوردی . خیر دیدم . « او یلہ ایسہ نور وجود سماوات وارضین صلی اللہ تعالی علیہ وسلم اقدمزی بیلوب او کر نمک ایچون بیت مقدسہ کیت » دیدی . در حال بیت مقدسہ کیتدم . وقتا کہ مسجد اقصانک آستانہ ایاغمی قویدم . یرلری ، کوکلری ، عرشی ، کرسی بی ، رسول اللہ صلی اللہ علیہ وسلم اقدمزہ طولو کوردم . همان شیخ مشارالہ رجوع ایلدم . تکرار « حبیب کبریا علیہا کمل التحایا بیلدکمی ؟ » سؤالی ایراد ایلدی . اوت ! دیدم : « ایشته شمدی طریقتک کمال بولدی . زیرا اقطابک قطیتی ، اوتادک وتدی ، اولیانک ولایتی انجق رسول اللہ صلی اللہ علیہ وسلم اقدمزی بیلمکلہ حاصل اولور . » بیوردی .

ینہ مشارالہ شیخ صفی الدین رسالہ مبجوثہ سندہ شیخ ابوالعباس الحداد قدس سرہ حضرت تلریندن روایہ یازمش کہ

بر کره حکمت نمای اسرار « ن والقلم » صلی الله تعالی علیه وسلم
 اقدمك حضور قدسیتنا هیلرینه شرفیاب مشول اولدم. کندیسنی
 اولیاء اللهک ولایت منشور لرینی یازار بولدم حتی او هنگام
 قدسیت اتسامده قرن داشم محمد دخی بر منشور ولایت یازدی .

مؤلف رساله دیور که مشارالیه شیخ ابوالعباسک برادری
 اکابر اولیاء اللهدن ایدی. یوزنده کیمسه نك کوزندن کیزلنه ميه جک
 درجه ده پارل پارل پارلیان بر نور ، کندیسنک ولی اولدیغه شبهه
 بر اقیور ایدی . حتی بو نورک سبب و حقیقتی بالذات کندیسندن
 صوردم . جواباً دیدی که « نور مبین الهی صلی الله علیه وسلم اقدمز
 بر کره یوزیمه او فوردی . ایشته بو نور ، او نفخه قدسیه نك اثر منوریدر .
 ینه مؤلف رساله دیمش که اجلاء اصحاب قرشیدن شیخ جلیل و کبیر
 ابو عبد الله القرطبی ایله بالذات ملاقات ایلام . که مشارالیه اکثراً
 مدینه منوره علی صاحبها افضل التحیه ده اقامت ایدر و سیدالوجود
 صلی الله علیه وسلم اقدمزله آرده لرنده ملاقات و مخاطبات و رد سلام
 کبی حالات جریان ایلمر ایدی و سرور انبیا علیه افضل التحیا
 اقدمزک مصر حکمداری ملک الکامله اولان اوامر جلیله سنی
 تبلیغ مأموریتیه مصره کیدرک ادا ی رسالتدن صکره مدینه منوره یه
 عسودت ایتمش ایدی . ایشته بو ذاتک لساندن ایشته مک
 اولیاء اللهدن بری بر فقیه سعادت انجمک مجلس تدریسده
 حاضر ایدی . فقیه مشارالیه بر حدیث شریف روایت ایلینجه
 « بوسوزی نرودن سویلیور سین ؟ ایشته شارع دین مبین صلی الله
 علیه وسلم اقدمز باشکک او جنده دور بیور و بن بویله سوز

سویلمدم بیوریور . » دیدی . فقیه متنبه اولوب عطف نظر
 ایدنجه پرده غفلت کوزندن صیریلهرق جمال باکمال محمدی بی
 مشاهده یه موفق اولدی .

ابن فارس قدس الله سره « المنح الآلهیه فی مناقب السادة
 الوفا یه » نام کتابنده یازیور که علی ابن وفارضی الله عنه بالذات
 کندیسنه خبر ویرمش که بش یاشنده اولدیغم حالد قرآن کریمی
 شیخ یعقوب نام ذاتدن او کونیور ایدم . بر کون تعلم قرآن ایچون
 شیخ مومی الیهک یانه کلدیکمده اوراده فخر کائنات علیه افضل
 التحیات اقدمزی کوردم . بو کوریشم او یقوده دکل او یا نقلقده
 ایدی حتی رسالتاب اقدمزک اوزرنده بیاض بر کوملک وارا ایدی که
 صکره او کوملکی اوزرمد بولدم ، بکا او قودیه امر ایدی بنده
 « والضحی » « الم نشرح » سورده لرینی او قودم . همان نظر ظاهر
 بینمدن نهان اولدی . وقتا که یکر می بر یاشنه واصل اولدم .
 صباح نمازینی ادا ایچون تکبیر آلوب تلاوت قرآن کریمه
 باشلا دیغمده امام محراب ملکوت صلی الله علیه وسلم اقدمز
 قارشومده متجلی و ظاهر اولوب بنی قوجاقلدی . « واما بنعمة
 ربك فحدث » آیت جلیله سنی قرائت ایلدی . ایشته او آندن

بری لسان بدیع البیان محمدی بکا احسان بیورلدی . اتی
 بعض معتبر مجموعه لرده مسطور در که غوث الواصلین سید
 احمد الرفاعی رضی الله عنه ایضای وجیه حج ایتدیکی سنه مهبط
 جبریل امین اولان حجره شریفه معطره نك قارشوسنده طور وروب

« یارسول الله ، جسماً اوزاق بولندیڭ زمان بالوکاله بویری اویمک
ایچون روحی کوندر ایدم . بوجیهی ایفا نوبتی بالذات
وجودمه کلکله ایشته جسم حاضر اولدی صاغ الکی اوزات که
بالفعل دوداغم فیضاب شرف تقیل اولسون » معاسنده اولان
(فی حالة البعد روحی کنت ارسلها)

(تقبل الارض عنی وهی نابتی)
(وهذه نوبة الاشباح قد حضرت)

(فامدد یمینک کی تحظى بها شفتی)
قطعه استرحامکارانه سنی اوقویجه مضجع رحمتسرای رسالتپناهیدن
اوزانان ید شریفه محمدیه بی تقیل ایلدی .
شیخ برهان الدین البقاعی معجم آدلو کتابنده یازمشدر که
ابوالفضل ابن ابوالفیض النویری کندیسنه دیمش که شریف
عقیف الدین حضرتلرینک والدی سید نورالدین الایجی روضه
شریفه سیدالانبیاه روسای تعظیم اوله رق « السلام علیک ایها النبی
الکریم ورحمة الله تعالی و برکاته » عبارمسیله ادای وجیهه سلام
ایدنجه یاننده بولسانلر مضجع علویتسرای رسول اللهدن
وعلیک السلام یا ولدی » خطاب رحمت مأبئی ایشتمشدر .
امام سیوطی رحمه الله علیه « تنویر الخلق » رساله سنده کی
سوزی بوراده ختام بولدی . مذکور رساله تنویر مدعای کافل دهه
برجوق شواهد ودلائلی شامل ایسه ده بوقدرله اکتفا اولندی .

شیخ خلیل الشافعی رحمه الله علیک کتاب فتاواسنده
سیدالانبیاء صلی الله علیه وسلم افدمزی رؤیت ومشاهده ایدنلر
حقننده مذکور اولان فتوی دخی بروجیه زیر آرایش صحیفه
اعتبار قانندی .

﴿ سؤال ﴾

فیخر عالم صلی الله علیه وسلم افدمزی اویانقلاقدده واویقوده
کورمک جائز میدر ؟ جائز ایسه حقیقه ذات شریفه محمدیه سیمی
کور یلیور وایکی کشینک بری مشرقده دیکری مغربده اولدینی
حالده بر آنده کورملری تقدیرنده بوبابده نه حکم ویریله یلیور ؟

﴿ جواب ﴾

احادیث شریفه حفاظ کرامی ، نور مطلق خدا صلی الله علیه وسلم
افدمزک اویقوده اویانقلاقدده رؤیتی جائز اولدینی بمخنده توحید کلام
ایتمشلر وشوقدر که بورؤیتیه موفق اولان کیمسه حقیقه ذات شریفه
محمدیه سنک جمالنی می یوقسه مثالنی می کورر بونده اختلاف ایدوب
ایکی فرقه یه انقسام ایلمشدر . قول اوله امام شعرانی وامثالی
وقول ثانیه امام یافعی وغزالی قائل اولمشدر . برنجی قولی
تصدیق ایدنلر اقامه حجتله دیدیلر که صلی الله علیه وسلم افدمز
سراج هدی ، نور ظلام ، شمس معارفدر . آفتاب جهان آرا

اوزاقدن مشهود اولدینی حالدہ جرمی مرکتر دوراندن نصل
ایرلیور ایسه کذلک مهر علیین فروز هدایت. صلی الله علیه وسلم
افندمزک جسم کریم و بدن شریفده کورلدیکی وقتده روضه
عرش آستاندن و ضریح قدسیات عنواندن ایرلمسی لازم کلز .
بلکه قادر لایزال حضرتلری رائینک کوزندن پرده غفلتی یرتوب
ومانعی ازاله ایدوب مکان اصایسندہ بولندیغی حالدہ مشاهدہ
ایتمی امکانی حصول بولور و بو نقطه نظر دن ایکی کشینک
بری مشرقده دیگری مغربده ایکن بر آنده و بر مکانده کورمسی ده
ممکن اولور و یاخود جناب حق قدرت بالغه سیله رائینک کوزنده
مانع رؤیت اولان پرده ظلمانی بی اوتہ طرفی ستر ایتیه جک
ضورتده شفاف بیوررده اوله کورر . قزافی رحمة الله علیه
دیدکی بومسئله ده محل نزاع، مظهر جمال حق صلی الله علیه وسلم
افندمزی کورن ایکی کشیدن برینک مشرقده کی خانه سنده
ودیکرینک مغربده بولان اوندہ و بر آن ایچده کورمش اولملری
جهتده در. زیرا خورشید جهانتابک شعاعی خانه ایچده کوریلور
اما جرمی آسمانده کی مکان اصایسندہ کماکان تجلیهای ثبات
بولنور . زیرا کونشک جرمی رائینک محلی حصر ایتیش اولسه
او جرمک محصوریتی آننده محل رائیدن غیری یرده بولنمی
مستحیل اولوردی . بناءً علیه رؤیت جمال رسول کریم مجتده
قول ثانی به ذاهب اولیق یعنی صلی الله علیه وسلم افندمزک مثال
باکالی کورلدیکنه حکم ایتک لازم کلدی . اکابر صوفیه دن
بر جماعت دخی عالم مثالی به قائل اولوب دیدیلر که رؤیت مثالی ده

مشهود اولان مثال، کزک صورت اصلیه نبویه به موافق اولسون
کزک اولسون، نظر حقیقتده مساویدر، زیرا مثال محمدی هرایکی
صورتہ آینه تابنک کیدر شو حالدہ صورت حقیقه رسالتپناهی
خلافتده کوریلان مثال، رائینک آینه مثال جلیل نبوی به انطباع
وانعکاس ایدن صورتندن عبارتدر . بعض صوفیه دخی التزام
توسطله دیدیلر که : صلی الله علیه وسلم افندمزک صورت و صفت
حقیقه سی اوزرینه رؤیتی تعبیردن مستغنی بر رؤیادر و شمائل
شریفه سندن بشقه صورتده رؤیت و مشاهدہ سی تعبیرہ محتاجدر .
مع هذا بر رؤیت علی کلا الوجهین عین حقیقتدر . بوبابده
شیطانک دخل و تلبیسی اولمدینی اتفاق صوفیه کرام ایله محققدر .
یعنی رؤیت اولسان صورت ، صفت شریفه نبویه به موافق
اولسه بیله محض حقدر . زیرا هر متصورک تصوری قبل
حقدندر . بناءً علیه رائینک سیدالوجود صلی الله علیه وسلم
افندمزی حال شیخوخته کورمسی نهایت مرتبه سلامت
و مأمونیتته و حال شایسته رؤیت ایلمسی شدت حرب و مجاهده سنه
و متبسم اولدینی حالدہ مشاهدہ ایتمی سنت شریفه محمدیه سنه
تمسک و مداومتہ و حال و هیأت اصلیه سنده شرفیاب شهود اولمی
صلاح حاله و کمال ترقی و اقباله و اعداسی عالینده مظفریتنه
و متغیرالحال کورمسی سوء حاله دلالت ایدر . حتی روشن نظر
توحید اولان کیمسه صلی الله علیه وسلم افندمزی عالم مثاله
کوردیکی وقتده فوق الحد کوزل و ملحد بالعکس چرکین کورر .
زیرا مظهر جمال حق افندمز آینه تابنک کی اولوب قارشینه

کلان صورت هر نه ايسه صفحه مجلای ذاتنده انطباع وانعکاس ايدر : ذات شريفه محمدیه سی ايسه همیشه جلوه پیرای احسن حال ومحاسن نمای ابلغ کمال اولوب شائبه تغیردن مصوندر. والله اعلم . قنوی شیخ خلیل شافعی حرفیاً بوراده نهایت بولدی . حاصلی بومدعای حقیقت انتمایی تنویر ایدن شواهد و دلائل صایلمقدن اکثر وخفی قالمقدن اشهر اولدینی جالده بوبابی ذکر ایتمکدن مقصدمز مجرد بوندن صکره بسط و بیان ایده جکمز مقصود اصلی به مقدمه تمهید اتخاذ ایتمکدر . برده خود بینان وغفلتپرستاندن اولوبده بو حقیقته اطلاعی اولیانلردن بالتصادف بورساله مزى مطالعه ایده جک کیمسه به وامثاله بوذ کراپتدیکمز شواهد ودلائل سبب تذکر وضعف فهم وعقلنه مدار تنبه وتیقظ اولمقدن . ومن الله التوفیق .

﴿ باب ثانی ﴾

سیدالکونین صلی الله علیه وسلم افندمزنك جسماً و روحاً مظهر سر حیات اولوب آفتاب جهانتابك هر مکانده جرمیه متجلی ایشجه سنه جمیع بلادی تنویر ایتسی کی ذات شریفه محمدیه سندنده برلطیفه جلیله مغویه نك علی حسب الاستعداد افاضه امداد ایچون جمیع عوالمه متعلق وهرشیده ظاهر وشارق اولدیفنه دائردر .

بو حقیقتك مأخذ اصلیسی « انا من الله والعالم منی » یعنی بن نور الهییدن مخلوق اولدیقم کبی عالمده بنم نورمدن یارادلمشدر . حدیث شریفدر وحضرت جابر رضی الله عنك « أول ما خلق الله نور نبيك يا جابر » یعنی ای جابر، فاطر مطلق تعالی شانه حضرتلر ينك الك أول یاراتدینی شی سنك پیغمبرينك نور یدر . حدیث مشهوری دخی اولکی حدیث شریفی تأیید ایدر و بومعناى حقیقت انتماکتب صوفیهده ومتأخرین مصنفینك تألیفات کلامیه سندده تصریحاً وتلویحاً کثرت اوزره مذکور ومسطور اولدینی جهته ازبجق مطالعه سی اولنلرچه خفی اولمیان مسائلدندر . لکن علامه کامل نورالدین الشافعی قدس سره حضرتلر ينك « تعریف اهل الاسلام والايمان بان محمداً صلى الله عليه وسلم لا یخلو منه زمان ولا مکان » عنوانیه تألیف ایتدیکی رساله یی کوردیم که مشارالیه رساله مذکوردهده مقصد اصلی به تعلق ایدن دلائل قویهدن برچوق نصوص درج و نقل ایتمش ونصوص مبحوتهدن کشف والهامی ، شریعت و کلامی جامع اولان محققین صوفیه کرامك بو مسئله مهمهده اعتقادلرینه یقین وبلکه انلرک محض اعتقادی اولان بر عقیده یی تلخیص ایلمش اولمسیه بویولده کی تألیفاتك جمله سنه فائق بولدیغمدن رساله مذکوردنك مواضع عدیده سندن بررنبذه صالحه اخذ واقتباسنی تصویب واختیار ایلدم .

﴿ تَنْبِيْه ﴾

بومسئله مهمه نك ادراكى كشف وذوقه وابسته ايسه ده شريعت معظمه ده بك چوق شواهد و اشاراتى موجود اولديغدن طالب حق و علم اولنلردن باري تعالى حضرتلرينك مظهر خير و سعادت بيورمغى اراده ايتديكى كيمسه شواهد و اشارات مذكوره يه كسب و قوف ايله مقصد اصلى يه هدايت بولور .

مشاراليه نورالدين الشافعى رحمه الله عليه رساله مباحوثه سنده دييور كه : بومبحث سعادت انجام حقتده كي سوزم شودر كه نور ديده مؤمنين صلى الله عليه وسلم افندمز وقتسا كه نظر ظاهر بين علمدن نهان اولدى . ازكاي رضوان و اعلاى فراديس جنانه انتال و تعبير ديكرله ترتيب معقول اوزرينه درجه و سييله يه اقتران و اتصال ايلدى . شوييله كه اولاروضه شريفه عليا و قبر معظم رحمت پيماسنه وصول بولدى صكره جناب قادر مطلق او نور مجسم رحمتى . بلاشبهه عند آلهيسنده اشرف درجات و واسطه استمداد كائنات اولان درجه و سييله يه رفع و اعلا بيوردى كه اولين و آخرين او مقام علويده غبطه كش سيدالمرسليندر . اندن صكره او آفتاب عاين فروز هدى ايستديكى زمان ديلديكى حيثيله اقطار آسمان و زمينى ، قره يى ، دريائى ، جبال و صحرايى ، حاصلى هريرى طولاشمق همچون مظهر اذن لايتغير خدا اولدى .

مع مافيه باري تعالى و تقدس ذات رسالت پناهيسنه اويله بر قوت و هب و احسان و كنديسنى اويله براهليتله فيضياب عز و شان بيوردى كه روز ارتحالندن قيامتدن صكره كي زمان غيرمتناهى يه قدر هر نه وقت بر نبى مرسل و يا بر ملك مقرب ندا ايتمش اولسه اكا درجه و سييله دن جواب و يرر .

اول نور مبين حق . درجه و سييله ده نصل تجلى پيراي اعتلا و اجابت نماي ملائك و انبيا ايسه هر طالب روشن دل دخى كنديسنى ارايجه حضور رب كريمنده كورر و هر متفكر اعمال نظرايتديكى تقديرده كندي و سعتخانه فكرنده و هر عارف حرم سراي سرنده بولديغى كي نظر كاه الهى اولان روضه مطهره سنى زيارتله سلام و يرر كيمسه دخى داخل قبرنده و الحاصل هر طالب اراديني شينك قنده بولور . نته كيم سائر انبياء عظام عليهم الصلاه و السلامى رختسراي قدس اعلاسنه رفع و اعلا ايلد كدن صكره سگان روى زمينى تائيس همچون انلردن برر جسدك قبر عطرناكلرنده اقامه سيچون اذن و اراده الهيه سى تعلق ايلدى .

حال تجروده اجساد ، ديلديكى حيثيته سىرو و حرکت همچون هر درلو قيوددن سر آزاد اولوب قبرده ده بولمقدن محجور و ممنوع دكلدر . بناء عليه هر نينك قبرنده برر جسدك اقامه سندن مقصود اولان معنا و نبى ذيشانى بر طالب اراديني و قتده اوراده بولمق و قبرى اوزرنده حاضر اولديغى زمان شخص جليسانى كورمكدن بشقه برشى دكلدر . بو حقيقتى موسى عليه السلام حقتده كي تفصيلات آتیه دهها زياده ايضاح ايده جكلدر .

امام سیوطی رحمه الله علیه سالف الذکر «تنویر الحاکم» کتابنده نبی
ذیشانم صلی الله علیه وسلم افندم زک مناماً و یقظه آمکان رؤیتی حقنده کی
نقول علمایی واحادیث شریفه بی جمع وتلفیق ایله کدن صکره
دیورکه : اشبو احادیث شریفه ونقول منیفه نک مجموعندن تحصل
ایدن حقیقت شودرکه روح الارواح کائنات علیه افضل الصلوة
افندم ز جسم شریفی وروح لطیفی ایله مظهر سر حیاتدرو کندیسی
عالم لاکوتدن هر فصل دیلر سه اقطار زمینده فرمانفرمای تصر فائدر .
و ذات شریفه محمدیه سی چشم عالمدن غائب اولمزدن اول نه هیئتده
ایدیسه هیچ برشی تبدل ایتمکسزین کماکان او هیئت مقدسه ده
تجانیهای ثباتدر . شوقدرکه ملائکه کرام جسدلر یله حی اولدقلری
حالده نظر مزدن مخفی اولدقلری کبی صلی الله علیه وسلم افندم زده
او یله جه ابصار ظواهر بینمزدن نهاندر . مع هذا جناب حق
نور بینش مؤمنین علیه صلوة المعین افندم زک رؤیتیه فیضیاب
سعادت اولمسنی اراده بیوردینی کیمسه نک رفع حجابنه اراده
الهییه سی تعاق ایدنجه هیئت اصلیه سیله ذات شریفه محمدیه سنی
مشاهده ایدر . او یله بر بختیار ازلی بی بوشرفدن منع ایده جک
هیچ بر سبب حاجب و بورؤیتک رؤیت مثالیه به تخصیصنی
استلزام ایله جک برداعی و موجب یوقدر . ایشته کلام سیوطی
بوراده ختام بولدی .

اما بزم سویندی کمز و سویله جکمز سوز : حقیقت حال
امام سیوطی علیه الرحمه نک دیدیکندن عبارتدر و بلکه اندن دها

مکمل وبالاتردر . زیرا یوقاریده اشارت ایتدی کمز وجهله جسد
شریف محمدیدن نه زمان و مکان ، نه محل وامکان ، نه عرش ولوح ،
نه کرسی وقلم ، نه دکرز وقره ، نه جبل وصحرا ، نه برزخ وقبر ،
خالی دکلددر . اونور الهینک جسد شریفه عالم بالا فصل ملو
ایسه بو عالم کائنات ومضجع ظاهر یسی اولان روضه پرنفحات
او یله طولودر . ذات شریفه محمدیه سنی بر آنده قبر معظمنده
مقیم ، بیت الهی طائف ، حضور رب کریمنده ادای خدمت
ایچون قائم ، درجه وسیله ده اقامتی سیبیه منبسط بولورسن .
کورمز میسن که اقصادی مشرقده یقظه و مناماً کورنلرک رؤیتی
عزیزه اوساعتده اقصادی مغربده مشاهده ایدنلرک رؤیتنه توافق
ایدر . بورؤیت مناماً میسر اولورسه عالم خیال و مثالده
وقوعبولمشدر . حالت یقظه ده واقع ایسه صفت جلال و جمال واعلای
غایات کمال ایله جلوه کر اولمشدر .

﴿ بیت ﴾

لیس علی الله بمستنکر ان یجمع العالم فی واحد

§

اگر برقائل میدانده چیقوبده دیرسه که بو بختده نور شمس

علمکز افق آسمان ذوق و عرفاندن می طلوع ایلدی . یوقسه
بوسوزلری عن جیب کندی نفسکزدنمی سویایورسکیز . بو حال
نه کیفیتله تصور اولنه بیلور ؟ و بر جسمک جمیع محاله حلول
ایتمی نصل صحیح اولور ؟ جواباً دیرمکه : اورنک پیرای
رسالت صلی الله علیه وسلم افندمزه قارشى ارتکاب کذب و خلاف
کندیسنی استخفاف دیمک اولوب حاشا شیم حاشا اولیه بر جرأت
کستاخانه دن صون صمدانی یه صغیریم و کذلک شرع شریفده
اولیان بر شیئی احداث ایدن کیمه نه نک مردود حق اولدیغی
بیلیم . بنم بو بحث قدسیده ذکر و بیان ایتدیکم شیر مجرد
فیض فائض الهام اولوب صحتی خصوصنده ان شاء الله اهل فهم
و شعور دن کیمسه توقف و تردد ایلمز مکرکه شاذ و نادر اوله رق
اهل اوهام و اصحاب ایهام و ایهامدن بری اوله .

﴿ بیت ﴾

ولیس یصح فی الاذهان شیء اذا احتاج النهار الى دلیل

معنای : نهار روشن دلیل و برهانه محتاج اولدیغی حالده
ارتق اذهان خالقده هیچ بر شیئک صحیح و ثابت اولماسی
لازم کلور .

﴿ بیت ﴾

واذا لم تر الهلال فسلم لاناس راوه بالا بصر

مفهومی : سن هلالی کورمدیکک وقتده کوزلریله کورنلرک
سوزینه اینان !

معلوم و مسلمدرکه بر شیئی بیان کیمسه بیلمیانه ، اکلایان ،
اکلامیانه ، حفظ ایدن ، حفظ ایتماش اولانه حجت و برهاندر .
ایشته بز دیرزکه سوز دلیلر صحیح اولمز . بزم بو بحثده ادله
صحیحه نقلیه و براهین وجودیه قطعیه مز واردر .

دلیلر مزدن بری : سندات عالییه صحیحه و مسانید ثابتیه
رجیحه مزده مروی و کافیه محدثین و حفاظ و جمیع اهل معانی
والفاظ عندنده ثابت اولان حدیث شریفدرکه رفرف سواربالای
ملکوت ، صلی الله علیه وسلم افندمز لیلئ مقدسه معراجده نبوت
ورسالتده برادری اولان موسی علیه السلامی قبرنده قائم اولدیغی
حالده ادای صلاة ایدر کوردی . صکره بیت بمقدسه کلنجه
اوراده ده یاننده بولدی . مسجد اقصادده سائر انبیاء عظامه
اتباعاً موسی علیه السلام دخی امام المرسلین افندمزک ارقه سنده
نماز قیلدی و اوراده رسالتمأب افندمزدن آرلدی . نبی ذیشانمز
افندمز دردنجی قات کوکه صعود ایدنجه موسی علیه السلام ایله
اوراده و یاخود دیگر بر سماده ملاقات ایلدی . نته کیم دیگر

بر حدیث شریفده نور بصر وجود صلی الله علیه وسلم افندمرك
 آدم علیه السلامی سماواتك برنجی قاتنده ، هرون علیه السلامی
 ایکنجی قاتنده ، یوسف علیه السلامی اوچنجی قاتنده ، ادریس
 علیه السلامی دردنجی قاتنده ، هرون علیه السلامی بشنجی قاتنده ،
 موسی علیه السلامی التنجی قاتنده ، ابراهیم علیه السلامی یدنجی
 قاتنده کوردیکی مذکوردر . مع هذا شو ایکی روایتی جمعاً
 دیرز که علیه الصلاة والسلام افندمرك حضرت موسی بی هر ایکی
 قات کوکده کورمش اولمی ممکندر . ایمدی موسی علیه السلام
 باعث ایجاد کائنات علیه افضل التحیات افندمرك مادوننده
 اولدینی حالده بر لحظه ده زمین و آسمانی طی و تماشا ایتک
 درجه سنده بویله مطلق العنان اولنجه یعنی صلی الله علیه وسلم
 افندمرك کنديسني قبرنده ادای صلاة ایدر براقش و بیت مقدسده
 کنديسندن آیرلمش اولدینی حالده سماء رابعه و سادسده کورمش
 بولنجه ارتق نور اصلی وجود افندمرك هم مکان علویسنده
 موجود و همده قبر معظمنده تجلیمود اولق صلاحیتی حائر
 اولمی اولویتده قالمقله برابر نبی ذیشانمرك صلی الله علیه وسلم افندمرك
 کائناتك ذات شریفه محمدیه سیله مملو بولنمی حیثیتندن حضرت
 موسی و سایر انبیاء علیهم السلامك مطلقیتلرندن زیاده پیرایه دار
 اختصاص و امتیازدر . زیرا فخر عالم افندمرك لیلئه اسراده نه ملک
 مقربك ونه ده نبی مرسلك وصول بولمغه دکل بلکه بر آدم آتمغه
 قدرتیاب اوله میه جفی بر مقام علوی به تقرب و ترقی ایلدی .

بو حکمته مبیدر که رئیس ملائکه کرام جبریل علیه السلام
 سدره منتهی قنده « وما منا الا له مقام معلوم » قولیه صلی الله
 علیه وسلم افندمركن کیرو قالدی . و ابراهیم و موسی علیهما السلام
 و امثالی بولندقلری سماواتدن ایلری کیده مدیلر .

شو دعوی صحیحی تنویر ایدن ادله نقلیه دن دیکریده ینه
 سندات عالیة صحیحه و مسانید ثابتة رجیحیه مزده و امام الائمة امام
 بخاری رضی الله عنک و امثالتك عندنده ثابت اولان حدیث
 شریفدر . زیرا بو خبر حقیقت پرورده مذکوردر که ملکین یعنی
 منکر و نکیر قبره قونیلان کیمسه یه اوراده حاضر بولنسان
 رسول اکرم صلی الله علیه وسلم افندمركی کوستره درك « ماتقول
 فی هذا الرجل » یعنی بو ذات حقنده نه دیرسین ؟ سؤالنی ایراد
 ایدرلر . اسم اشارت اولان « هذا » لفظی ایله ایسه انجق حاضر
 اولان کیمسه یه اشارت اولنور . « هذا » نك حقیقت معناسنده
 اصل اولان بودر ، اما بعض علمانك صلی الله علیه وسلم افندمرك
 مقبورك یاننده جسداً دکل ذهناً حاضر بولنمی ممکن اولدیغنه
 دائر اولان قولی بو مقامده قبول و تصدیقه یول یوقدر . زیرا
 بو بحشده حقیقتدن مجازه تجوز و عدوله سبب کوریله مز .
 بناءً علیه سیدالکونین صلی الله علیه وسلم افندمرك مقبورك
 قارشوسنده جسد شریفیه حاضر بولندینی محققدر .

اشته شو ذکر و بیان ایتدی کمز ایکی دلیل نقلی بی
 فطرت و فطنت سلیمه و نیت مستقیمه اصحابی حسن قبول ایله
 تاقی ایدر بناءً علیه بومبحث مهمده مشوت صحیفه اذغانمرك اولان

ادله قطعیة عقلیه بی سرد واتیانندن بشقه بروطفه من قالمدی .
بونلریده بیان ایتدکن صکره ادنی مرتبه اسلامیت و انسانیتدن
بهره دار اولان کیمسه نك عرض تسلیمیت ایتسی واجب اولور .

برهان اول : رسول اکرم صلی الله علیه وسلم اقدمزك روح
وجود کلی اولدیغنده مؤمنیندن کیمسه تردد و مخالفت ایلمز .
هیچ کوردکی ، ویا ایشدکی که برووجود تام الاعضا ، اثر نمای
حیات اولدجه انك اجزاسندن بر جزئك روحدن خالی قالمسی
ممکن اولسون ، فخر کائنات علیه افضل التحیات اقدمز عوالم
علویه و سفلیه نك روح روانی اولدیغی مصدق اولنجه عوالم
مذکوره دن هیچ بر جزئك جسد شریف احمدی و روح لطیف
محمدی سندن خالی قالماسی طبیعی دکیدر ؟

بوقضیه نك صحته دلیل ، سید البرایا علیه اکرم التحایا اقدمزك
« لَا إِشْكَ الْمُؤْمِنُ شَوْكَةً إِلَّا وَجَدَتْ أَلَمَهَا » حدیث شریفیدر که
مضمون جلیلی : مؤمن بر دیکندن متأذی اولمز الا اودیکنك
المنی کندی نفسمه بولورم . دیمکدر .

برهان ثانی : اولیاء الله بدن بر جماعت عظمتت مشاهدۀ دائمه
رسول الله ایله شرفیاب سعادت و بختیاری اولمایدیر . کورمز میسن که
جلال الدین السیوطی علیه الرحمه کتاب تنویر الخلق کنده
وسائر اجله ثقات کندی کتابلرنده نهلر یازدیلر . عارف بالله
ابوالعباس الطنجی رضی الله عنک سید احمد الرفاعی رضی الله عنهدن
سلوک کورمک ایچون استمداد ایتدیکنده جریان ایدن حل

مشار الهمك بومبجئده تأیید ایتدکلی وقایع صحیحه دن اولوب
تفصیلاتی بالاده خامه کذار تحقیق اولمشدر .

ایشته بو حکمته مبیدر که انسان ولو اویقو سبیلله اولسون
نفسندن آیریلنجه و کوزینی قیابجه جناب حق قسمت ایتمش ایسه
صلی الله علیه وسلم اقدمزی کورمکه موفق اولور . یا بسبتون
شهوات نفسانیه سندن تجرید نفس ایدوبده « مَوْتُوا قَبْلَ أَنْ تَمُوتُوا »
سرینه مظهر اولورسه کندیسيله روح وجود ، صلی علیه الودود
اقدمزك اره سنده نه اویقوده نه اویانقلقده حجاب قالمیه جغنده
شك وشبهه قالیرمی ؟

شیخمر شیخ نورالدین الشونی قدس الله سره بوشرف
وسعاده نائیتله بختیار سرمدی یعنی ایلا ونهاراً اکثریاقیر العین
دیدار محمدی ایدی ، وسید ابوالعباس المرسی قدس الله سره
« اکر رسول الله صلی الله علیه وسلم اقدمزك جمال بیثالی
کورمکدن بر لحظه محجوب قالمه ، نفسی مسلمیندن صایماز
ایدم » دیرایدی . بوبابده کی خبرلر صایماقدن اکثر اولوب ضبط
وحصری متعذر اولدیغندن بوقدرله اکتفا ایلدک .

برهان ثالث : ابدال تسمیه اولنان اولیاء الله در که بونلردن
برینه « بدل » دنیلور زیرا ایچلرندن بری بریره سفر ایدنجه
کندی برینه صورت حقیقه سنه بکزر بر بدل براقیر .

اکا بر ابدالدن قضیب البان قدس الله سره ترک صلاة
ایتدیکندن طولانی حضور محکمه شرعیه ده علمیه اقامه دعوی

اولنجه قاضي كنديسنه ديدى كه : سن بودعوايه نهديرسين ؟
هان كنديسندن يدى صورت جلوه نماى ساحه ظهور اولدى كه
انلردن هر برينك قضيب البان اولديغنه شك وتردد اولنمزايدى .
او صورتلردن هر برى قاضي يه وودعوا جيلاره خطاباً « بزلردن قغيمز
اوزرينه ترك صلاتى دعوا ايدييورسكنز ؟ ديديلر . اتهى .
ايمدى ابدالدن برندن يدى صورت جلوه كر اولنجه
اكمل الرسل صلى الله عليه وسلم افدمزك هزاران هزار مثالى
ظاهر اولمازى ؟ بو مبحثده نقله شاين اولان وقايعدنر كه
تاج الدين ابن عطاء الله الاسكندرى رضى الله عنه كه حكم ، تنوير ،
تاج العروس ، لطائف المنن كې آثار بر كزيدهنك مؤلفيدر .
انك مریدلرندن برى حج ايتديكى سنه مواقف حجدن هيچ
بر موقفده طورمدى كه اوراده شيخى تاج الدين حضرتلرني
كورميه . شوقدر كه مرید مومى اليه كوردىكى يرلرده يانه كلوب
لقردى سويلمك ايتديكى كې مشاراليه كوزى او كندن نهان
اولوردى . مصره عودت ايتديكى وقتده اول باول شيخك حال
وصحتنى سؤال ايلدى « زيرا آنك هر يرده ظهورينى تقيد
جسمانيتدن سر آزاد اولديغنه حمل ايلمشيدى . الحمد لله ، حياتده در
ديديلر . وقتا كه شيخ مشاراليه ايله ملاقات ايلدى . مكاشفة فلان
يرده شويلاه اولمديمى ؟ فلان يرده شو حر كته بولنكمى ؟ ديه
كنديسنگده بر ابرجه بولنديغنى اظهار ايلدى .

برهان رابع : جناب قادر لايزال نبى ذيشانى صلى الله عليه وسلم
افدمزى ماه رخشان كې بر تجليگاه شامل الاطرافده متجلى

بيوروبده اقصى مشرق ومغربده بولسانلر نصل بر آنده بدر
منبرى كورلر ايسه عليه الصلوة والسلام افدمزى ده او صورتله
رؤيت ايتلمزى ممكنات معقوله مشهوده دن اولمسيذر . بدر بويلاه
اولديغى كې شمس ، زهره ، سائر نجومده اويله در سگان روى زمين
بوللرى رؤيتده متساويدر . زيرا جناب حقك بوللر ايچون
تخصيص بيورديغى مكان ووضعت . بو حكمتى . مقتضيدر . بناء عليه
قدرت بالغه النسيهيه نسبتله بعيد دكلدر كه مدينه منوره ده كى
ضريح رحمتناه سيد الكونين ، ماه و آفتاب منزاتده اوله واستبعاد
اولنمز كه جناب خالق لم يزل مدينه دن غيرى محله صلى الله عليه وسلم
افدمزدن بر جسد خاق بيوروبده اوراده ده رؤيت ومشاهده
قيلنه ، بشرط آن كه رايئيك چشم بصيرتى پرده پوش غفات
وانكار اولمايلدر . زيرا چشم ظاهرى كور اولان كيمسه
هر كسك نظرنده بارز و ظاهر اولان شمس و قمرى ونجومى
كورهمديكى كې اعمام بصيرت دخی هيچ برشى كورمز وهيچ
بر شيه اينانمز .

نظم بديعزدن اولان شو اوج بيت موافق صدد
كورلديكندن ايراد اولندى :

مثال النبي المصطفى في وجوده

لسائر ارض الله والعجم والعرب

عَلَى أَنَّهُ فِي قَبْرِهِ طَابَ تَرْبَةٌ

بَطِيَّةٌ دَامَتْ مِنْهُ فِي صَلَةِ الْقَرَبِ

كَبَدَرِ تَعَالَى فِي السَّمَاءِ وَضُوْهُ

يَعْمُ عَلَى الْاَكْوَانِ فِي الشَّرْقِ وَالْغَرْبِ

خلاصه مدلولی : نور مبین حق صلی الله علیه وسلم افندمزك
مدینه منوره ده مضجع آرای رحمت اولان وجود انور واقدسنك
سائر دیار وممالكه تجلیسی آسمانده جلود پیرا اولان بدر منیرك
شرقا وغربا کائناته نور افشان اولسی کیدر .

﴿ دو بیت ﴾

انظر الى المختار كيف وجوده

ملاء السما والارض والاكوانا

فتجده مثل البدر في كبد السما

وضيائه ملاء الوجود عيانا

فذلكه مالى : حبيب ادیب کبریا به نظر ایله که آنک وجود

اقدس ومنوری، زمین و آسمان وكافه اكوانى نصل طولیدر مشدر .
بدر منیر کبی آسمانك اورته سنده کوردیكك حالده ضیاسی
وسعتسرای وجودی عیاناً لبریز ایلمشدر .

برهان خامس : جناب قادر مطلق بتون دنیایی ملك
الموتك مشمول نظر مأموریتی قیلدیغی کبی باعث آفرینش عالم
صلی الله علیه وسلم افندمزه ده كافه عوالم علویه وسفلیه نی نظرگاه
دائمی بیورمش اولسنك جائز وممكن ومتعقل بولنمیدر .

ملك جلیل جناب عزرائیل علیه السلامه سؤال ایتدیلر که :
بری مشرقده دیکری مغربده بولنوبده اجلی کلمش اولان
ایکی آدمك بر آنده روحنی نصل قبض ایدیورسین ؟ جناب
حق نظر مده دنیا وما فیها بی طعام ایدن کیمسه نك اوکنده کی طباق
کبی دوروب دوشیردی . بنده ایستدیکمی قبض وتناول
ایدیورم دیمشدر .

برهان سادس : عالم برزخك یعنی بو حیات پنچر وزه دن
صکره کیده جکمز عالم الطفك حالوشان وتجلیات حیرت عنواننك
دیگر عالمره مقیس اولمامسیدر . زیرا شریعت غراده وارد
اولدیغی اوزره سؤال ملکوری یعنی منکر ونکیر درجه نهاییده
عظمت جسدلریله برابر طار مزارلره کیررلر . بونلر نره دن
کیروب نره دن چیقارلر وبری مغرب ودیکری مشرقده بونندیغی
حالده بر آنده اجلی کلمش ومزاره کیرمش ایکی میتی ویابر چوق
امواتی بروقتده نصل صورغی الله آلیرلر . وجنت ، سدره المنتهانك
اوستنده وجهنم ، بحر مالک التنده اولدیغی حالده نصل اولوبده

قبرك بر طرفی پرمق اوجیله دلوب جنت وجهنمه نافذ و ناظر اولمق
اوزره بر رنجره آچارلر؟ بو حاللرك هپسی او عالم بدایعناك مقتضیاتندن
اولوب عتول قاصره ایله ادراك اولنه حق حالاتدن دكلدر. حاصل
كلام جناب حكیم لایزالك قبضه قدرت صمدانیه سنده دكلیدركه
سؤال ملكرینه و عزرائیل علیه السلامه ویردیكى قدرتی، روح
عالم صلی الله علیه وسلم اقدامزه احسان بیورسون. زیرا منكر
ونكیر، هادی امت صلی الله علیه وسلم اقدامزه ایمان اولنوب
اولمادیغنی سؤاله مأمور اولدقلرینه نظراً شبهه یوقدرکه مرتبه
جلیله رسالتناهیسنك مادوننده درلر.

ایمدی گذارشیدیر خامه تحقیق اولان مقالات واجوبه
وسؤالات نتیجه سندن اكلاشادیکه سیدالوجود صلی الله علیه
وسلم اقدامزك جسد شریف و روح لطیفندن نه زمان و مکان
ونه عصر و آوان خالی دكلدر. و شرعاً تقرر ایدن حالاتندركه
عالم بر زخده آزاده سر قیود اولان ارواح مؤمنین، بالا پرواز
علویات و جنات اولدقلری کبی احياناً جسملرینی زیارت ایچون
قبرلرینه ده کلورلر. و موطن بر زخیلری اولان سماء دنیادن
قبرلرینه قارشى یقین طور درلر. و مؤمن میت، قبرینی زیارت
ایدن کیمسه یی طایر و کندیسنه سلام و یرن کیمسه یه ده قدرت
یزدانی و اذن ربانی تعلق ایدنجه رد سلام دخی ایدر. و اموات
مؤمننك بووقوف و عرفانی جمعه کوننك زوال وقتندن
زیاده لشمکه باشلا یوب جمعه ایرتسی کونی صباح و قته قدر
دوام واستمرار ایلر. ارواح انبیا و اصفیا ایسه مطلقیت

و معرفتده عوام مؤمنینه فائق اولدیغنی کبی آل و اولاد رسول الله
و صحابه کرام و علمای عاملین و شهدای کاملینك روح پاکلریده
بالاختصاص علین پرواز اوج اطلاق و عرفاندر.

هله انبیاء عظام علیهم الصلاة والسلام، اشباح وارواحیله
بو عالم کونده بلا مانع و مزاحم کشت و گذار و اذن الهی تعلق
ایدنجه احرام پوش حیات اولدقلری زمان کبی ایضای حج
و اعمار ایدرلر. روح کائنات نبی ذیشانمز صلی الله علیه وسلم
اقدامز ایسه مظهر اختصاص و امتیاز حق اولوب جسد
شریف و روح لطیفیله تکمیل عوالم علویه و سفلیه یی
طولیدر مشدر. زیرا کندیسى باری تعالی و تقدس حضر تارینك
افضل عباد و عبادیدر. و بتون دنیا و مافیها فضل و کرم ربانیسیله
اورسول کریمك نظرگاه قدسیت آبادیدر.

اگر بر قائل حیقوب دیرسه که بو مبحث مهمده کی ایضاً ماتکنز
بك کوزل و افاداتکنز اتم واکلدر، لکن سزه شایان نظر اعتبار
بر سؤال توجه ایدیورکه بو کتابك فائده سی تکمیل ایتك ایچون
اوسؤاله جواب ویرمکنز و اجیدر اوده بودرکه الله تبارك و تعالی
حضر تلری صلاة و سلام ایدنلرك تصلیه و تسلیملرینی تبلیغ ایچون
ضریح رسول الله صلی الله علیه وسلم بر ملك مأمور بیورمش
واصل وجود کائنات علیه افضل النحیات اقدامز جمعه کیجه سیله
جمعه کوننده ایدیلان صلاة و سلاملری بالذات ایشیدوب علی کل
حال رد سلام ایتمکده بولنمش اولدیغنی صحیح اخبارده مذکوردر.

شو حالده افضل الرسل افندمن ديديككنز کي هر مکانده حاضر و مشهور ، يا خود هر بر زمانده موجود بولنمش ويا قبرمنورندن عالم اعلايه رفع ايدلش اولسه ایدی امر تبليغ صلوٰۃ ایچون ملکک مأموریتنه احتیاج قلمز ایدی .

جواب : بو کتابک مفادنندن معلومکنز اولمشدر که مدینه طیبهده مطاف قدسیان هفت آسمان اولان قبر شریف منور . علی صاحبه من الرحمن الرحیم ، افضل الصلوٰۃ واشرف التسليم جسد شریف محمدیدن غیر خالیدر . بلکه جمیع عالم علوی و سفلی روح الوجود صلی الله تعالی علیه وسلم افندمزله نصل طولو ایهه ضریح عرش آرای نبویسیده اوپله مالیدر . و او قبر منوره خلول و دفنی ، عوالمده متجلی اولان جمیع شئون رسالتپناهیسندن ده قوی و قویم ، برشان جسیم و تجلی عظیمدر .

ایمدی هر فرمانفرمای کشور عالمک بر پایتخت سلطنتی و بر دولتسرای شوکتی اولدینی کبی سلطان سریرلی مع الله افندمزکده مدینه منوره تجلیسرای انوار حکمت و حکومتی و روضه مطهره حرم کعبه توأم جلال و عزتیدر . بناء علیه اوراسی خدمتروایان ناسوت و کارگذاران ملکوتک مرکز مأموریتیدر . او مقام مقدسده خدام و طواشی ظاهر آو پرده داران سرادق ملکوت اولان ملائکه کرام علیهم الصلاۃ والسلام دخی باطناً خدمت ایدرلر . بو تقدیرجه جناب خداوندیچون و چرا تعالی شانه حضرتتربینک امت مرحومه احمدیه طرفندن عرض اولنان صلاۃ و سلامک اظلاعکاه اقدس

نبوی یه تبليغ وظيفه سنی ادا ایچون نکهبانان مواقف ملکوتدن بر ملک مخصوص ، مأمور بیورمش اولمشی ، قدر جلیل رسالتپناهیلرینی توقیر و تجیل ایچوندنر . والا بعد مسافه صلاۃ و سلامتک عکس انداز سمع رسول الله اولمسنه مانع و حجابدر دعواسنده بولنانلره کوره قبر شریف منور و شبکه جلال پرور رسالتپناهی دخی حجب و موانع حسیه دن معدود اولیق لازم کلور ایدی . حالبوکه حقیقت حال اوپله دکلدر . شوايضاحدن بیاندی که روضه بهشت آرای رسول اکرمه ملک مذکورک مأموریت و ملازمتی ، مجرد ادای وظیفه خدمتله دوام اقامه حرمت و جمعه کیجه سی و کونه تخصیص شرف و مزیت ایچوندنر . شو حالده بیان ایتدیکمنز خبر صحیحک معنای شو اولیسور که باری تعالی و تقدس حضرتلری لیل جمعه نک شانه اهتمام اولنمش ایچون صلی الله علیه وسلم افندمزله او کیجه ده فضله ادراک ، احداث و افاضه بیورر . وكذلك ملائکه کرام و خدامک ملازمتی دخی جسم شریف محمدینک مضجع رحمتی اولان محاک زیارتدن معطل قالماسی ایچوندنر .

سراثر شناس اولین و آخرین علیه الصلوٰۃ المعین افندمزک هر مکان و زمانده حاضر بولندیغنه دلالت ایدن ادله عقلیه و نقایه دن بریده « يَا أَيُّهَا النَّبِيُّ إِنَّا أَرْسَلْنَاكَ شَهِيدًا وَمُبَشِّرًا » آیت جلیله سنده بیان بیورلدینی وجهه باری تعالی و تقدس نی ذیشان بالعموم قوللرینک خیر و شر عملیرینه شاهد نصب

بیورمش اولمیدر . شاهدایسه همه حال مشهودك قارشوسنده حاضر و مشهود بهی ناظر بولمق لازم کلور بودلیل فرقانی ایله ده معلوم اولدیکه اعرف الانبیا علیه اکمل التحایا اقدم من جمیع عالمه متجلی و ظاهر و هر مکانده حاضر در .

انبیاء عظام علیهم السلامك عالم کونده کشت و کذار ایتدکلرینی مؤید اولان ادله دن بریده جلال الدین سیوطینك « کتاب الاعلام بحکم عیسی علیه السلام » آدلو کتابنده روایت ایلدیکی شو حدیث شریفدر : « اِنَّ النَّبِيَّ صَلَّى اللَّهُ عَلَيْهِ وَسَلَّمَ كَانَ يَطُوفُ بِالْبَيْتِ حِينَ فَسَلَّمَ عَلَى شَيْءٍ فِي الْهَوَى فُسِّلَ عَنْ ذَلِكَ فَقَالَ رَأَيْتُ أَخِي عِيسَى ابْنَ مَرْيَمَ يَطُوفُ بِالْبَيْتِ فَسَلَّمَ عَلَى وَسَلَّمَ عَلَيْهِ » یعنی مفخرانس و جان علیه صلوٰۃ الرحمن بر آرق بیت الله الحرامی طواف بیوررکن هواده بر شیئه سلام و یردی . حاضر بولنان اصحاب کرام ، سببی استفهام ایدنجه قرداشم عیسی ابن مریم علیه السلامی طائف بیت الله ایکن کوروب بکاسلام و یردی . بنده ردسلام ایلدم . جوابیله انبیاء عظامك چشم ظاهرین جهانندن نهان اولدقدن صکرده سیرعالم ایتدکلرینی تأیید بیوردی .

حافظ ذهبینك و امثالک قولنه کوره اشبو حدیث شریفك حکم جلیلی ایجابجه حضرت عیسی علیه السلامك هم نبی و رسول همدیه صحابی اولدینی تقرر ایلمشدر . شو حالده نبی مشارالیه

افضل صحابه اولوب کندیسنی ترتیب معقول اوزرینه فضیلتده چهار یارکزین رضی الله عنهم ولی و تعقیب ایدر .

انبیا علیهم السلامك عالمه کشت و کذارلری ایسه کندی منفعتلریله برابر نفع عباد ایچوندر .

صلی الله علیه وسلم اقدم من ایسه کشت و کذار ایتدکلر استغنا نموندر . زیرا جسد شریف و روح لطیفیله عوالم علویه و سفلیه مشحوندر .

ای مرید ارشاد خواه ! شورا سنیده بیایکه جلال الدین السیوطی علیه الرحمه نك نبی ذیشان صلی الله علیه وسلم اقدم من ک سیر کائنات بیوردیغنه دائر کذار شذیر صحیفه بیان اولان عبارده سی حروفیله و منطوق و مفهومیله دلالت ایدر که صلی الله علیه وسلم اقدم من دنیای طولیدر مشدر . زیرا بویله اولمسه یدی دورعالم بیوردیغی زمان قبر منورینك ذات شریفه محمدیه سندن بوش قالمسی و روضه مطهره سنی زیارت ایدنلرک یالکمز ضریح شریفنی زیارت ایلیمسی لازم کلوردی . بوصورته ایسه هیچ کیمسه قائل دکلددر . و کذلک « هرکیم بنی اویقوده کوررسه اویانقا قدده کوره جکدر » مألنده اولان « من رأی فی المنام فسیرانی فی الیقظة » حدیث شریفیده حالت بیداریده مشاهده جمال نبوی به صراحت و دلالت کلیه ایله الک قوی برهان و حجتدر . زیرا بوتبشیر رسالتیناهیسی وجهله مشارق و مغاربده نیجه بختیاران حقیقتپرور مشاهده دیدار قدسیت آثار یله روشنظر اولمشدر . وبالاده ذکر و بیان اولندینی اوزره بورؤیتك آخرتده وقوعبوله حق رؤیتله تفسیری صحیح

دکدر . چونکه آخرتده سائر امتلر دخی کوره جکلری جهته
دنياده کورنلره کورميانلر مساوی اوله جتدر .

حاصلی روح وجود کائنات ، عليه افضل الصلوة اقدمز
حساً ومعناً ، جسماً وروحاً ، سرّاً وبرهاناً ، حکمت نماي وجود
وپيش بصائر اولی الابصارده متجلی و مشهوددر . شيخ نورالدين
الشافعي قدس الله سره حضرت تليرينك رساله سنده مقصود اولان
مباحث ايشته بوراده ختام بولدی .

سيد احمد ابن محمد الدردير العدوی قدس سره ترتيب ايلديكي
صلاة شريفهده عبدالسلام ابن المشيش رضي الله عنهن نقلاً :
« واجعل الحجاب الاعظم حياة روحی » عبارده سی مندرج اولوب
مذكور صلاة شريفه نك شارحي اولان احمد ابن محمد الصاوی
قدس سره بوجه نك شرحده ديركه ؛ حجابدن مقصود ، محمد مصطفى
صلى الله عليه وسلم اقدمز اولوب حجاب اعظم وبرزخ كلّي وامثالي
اسماء جليله ايله ده مسما در . شو حالده « واجعل الحجاب الاعظم
حياة روحی » جمله تضرعكارانه سنك معناسی يشيل اغاج صودن
كسب نشوونما ودال بوداق پيدا ايدرك اوزاديني كي بنمده روحی
آياری فيض محمدی ايله فيضياب امتداد بيور! ديمكدر .

طاتلي صو ، حیات ابدان ونبات اولديني مثلوارواحك
حیات وروحی ده فيخر کائنات عليه اشرف التحية اقدمزدر .
بناءً عليه روح الارواح اقدمزدرن استمداد واستغاثه ايتيمان

ارواح ، اموات ديمكدر كه انلرده اهل كفر وعصيانك
روحلريددر . انتهى .

﴿ باب ثالث ﴾

جناب رسالتأب عليه صلوة الوهاب اقدمز حضرت تليرينه
واصل اولمق اسبابنك انواعيله روح عالم صلى الله عليه وسلم
اقدمز ، حضرت تليرينه توجه وتعلقك كيفياتي ميندر . بورساله نك
ترتيندن مقصود اهم دخی بودر .

اولياء كرام قدس الله اسرارهم حضراتيندن چوغنك
تربيه لري بدايت امرده حجر وحمايه رسول مجتبي عليه اكمل التحاياده
واقع اولمشدر . محقق عارف سامی مولانا عبدالرحمن جامی قدس
سره كتب مؤلفه سندن بعضيسنده شيخ فريدالدين العطار قدس
سرالستار حضرت تليريندن نقلاً روايت ايدر كه مشايخ طريقت
وكبراء اهل حقيقتك اولياء عظامدن اويسيلر تسميه ايتدكلري
بر قوم مسعود واردر كه كنديلريني روح عالم صلى الله عليه وسلم
اقدمز . اويس القرني رضي الله عنه الباري حضرت تليريني تربيه
بيوردقلى ككي بالنفس وبلا واسطه كندی حجر وحمايه
رسالتپناهيلرنده تربيه بيوردقلىرندن اشبو قوم عالي مرشدظاهره
محتاج اولماشلردر . لكن بو مقام قدسيت اتسام ، غايت عزيز
وقيمتدار اولوب اشبو مقامه هر كيم واصل اولور وبودوات

سرمدیه کیمه توجه ایدرسه « ذلك فضل الله يؤتيه من يشاء » مدلول جلیله مظهر اولش اولور . و كذلك اولای کرامدن روح عالم صلی الله علیه وسلم افدمن حضرتلرینه بیعت ایدن بعض کبرا دخی کندولر یچون بر ولی و مرشد ظاهری اولمقسزین روحانیت جلیله رسالتیناهی ایله تربیتیاب فیض و ارشاد اولمشلر ، واشبو جماعت ذی سعادت دخی « اویسیلر » فرقه جلیله سنه داخل بولنمشلردر ، مشایخ طریقندن چوغی بدایت سلو کده بومقامه توجه ایدرلر . انتهى .

شیخمن رضی الله عنه بر مریدده وهله اولیده آرز یحق اهلیت کورسه لر ذات رسول الله توجهی تعلیم بیورر و سائر مریدانه ایسه مقام احسانه توجهله امر ایدر ایدی . و « مراقبه ده اصل اولان احساندر جناب حق قولک قلبی تجلیاتندن دیلدیکنه اخذ و جلب ایدر و حضرت شیخه و یاخود ذات حقه توجه دخی مقصوده تسهیل و تقرب عظیمی موجبدر » دیر ایدی .

بویابک فتحی وسائل و اسبابک اسهل و اشرفی ، سید الوجود صلی الله علیه وسلم افدمنک کتب سیرده مضبوط اولان شمائل جلیله لر و جهله صورت شریفه لرینی خیالده مفصل اولنجه یه قدر اجمالاً و یاخود رؤیای سابقه ده مشاهده ایدلمش هیئتله تفصیلاً استحضار اتمکدر .

« بن قولک ظنی قتندیم بنم ایچون دیلدیکنی ظن ایتسون » مدلول جلیلی شامل اولان « انا عند ظن عبدی بی فلیظن بی ماشاء » حدیث قدسی صحیحی بو حقیقته دلیلدر . و جناب حق

حسن ظن حسن عبادتن معدود بولندیفی « حسن الظن بالله من حسن العبادة » حدیث شریفیه ثابتدر .

بو حالده قول ، مولای کریمی حقنده معالی امور دن هر هانکی شئی ظن ایدر ، و بوظنده صدق و یقین ایله وجهه دار بارگاه احدیت اولورسه جناب حق او قوله ، ظن جمیلی موجبنجه معامله بیورر .

ذات باری تعالی و تقدس حضرت تاری حقنده ظن علوی همتانده بولنان کیمسه علو همتک مستند اولدینی توفیق الہی دلاتیله مقصد حقیقت جو یانه سنه واصل اولور . و كذلك نور جبهه اسلام علیه الصلاة والسلام افدمن حضرتلرینک حدیث احسانده واقع اولان و معنای جلیلی « احسان ، جناب حق کوررکی عبادت ایتمکککدر . » تعلیم عالسنی متضمن بولنان « الاحسان ان تعبد الله كأنک تراه » قول شریفی دخی احادیث جلیله صحیحه دندر . حضرت رسول کبریا صلی الله علیه وسلم افدمن بو حدیث شریف موجبنجه مادامکه بزه باب خیالی استعمال ایچون آچمشدر ، ارتق اوباب هدایتیابی قیامق معقول و روا دکدر .

عارف شهیر مولانا بکری حضرت تاری « الفتوحات الالهیه للحضرة النبویه » نامیه تألیف ایلدیکی رساله ده سرور کائنات علیه اشرف التحیة افدمنک مشاهده جمال جمیلنه بتوفیق الله تعالی وسیله اوله بیله جک توجه قلبی بر قاج قسمه تقسیم ایلمش و جناب الله کندیسنه خیر ایله مکافاة بیورسون ، اولبابده پک

کوزل سوزلر سويامش اولديغندن اقسام مذکوره يي بروجه زير
پيرايه صحيفه بيان ايلدک . مؤلف مشاراليه اقسام مذکوره يي
بيانه باشليه رق ديرکه : اي قرداشم جناب ولي التوفيق ، بني
وسني روشنظر جمال محمدی اولمغه موفق بيورسون . معلومک
اولسون که حضرت نبويه توجہات قلبيه نك قسم اولی ،
مظهر تام الہی صلی اللہ علیہ وسلم افندمک صورت شريفه سنی
کمال اجلال و تعظیم و ہیئتہ پیش نظر خیالکده استحضار ایتک
واستحضاره موفق اولدیغک حالده حضور لامع النورنده کمال
تأدبہ بولمقدرد . بوکا مقتدر اوله مدیغک تقدیرده رؤیاده کورمش
اولدیغک صورت جلیله یی کوزیکک اوکنه کتیر ! اکر رؤیاده ده
کورمک شرفه اصلاً نائل اولمامش ایسه ک او حالده صلی اللہ علیہ
وسلم افندمک حضرتلرینه صلاوة وسلام او قودیغک وقتده اجلال
و تعظیم و هیئت و حیا ایله متأدب اولدیغک حالده کنديکی حضور
اقدس رسالتپناهینده حاضر ، فرض و تصور ایله ! محقق بیل که
علیه الصلاوة والسلام افندمک حضرتلری سن ذات شریفی ذکر
ایتدجکه سنی کورر ، و ایشیدیر . زیرا عارف معروفک و صفیه
موصوف اولوب افراد بشر ایچنده ایسه جناب حق انک زیاده
بیان اعرف الانبیا علیہ افضل التحایا افندمک اولدیغی ایچون
صفات جلیله الہیه ایله ده انک زیاده بهره مند اتصاف کنديلری
بولندیغندن و حق سبحانه و تعالی حضرتلری ایسه کندينی ذکر
ایدنلرک عظمت و جلال ربانيسنه لایق صورته جایسی اولدیغندن

نور رحمت مولا صلی اللہ علیہ وسلم افندمک بوصفات جلیله الہیه ایله
موصوفیتندن طولانی سنی کوروب ایشیده جکنده امین و مطمئن اول .
قسم ثانی : جناب رسالتپناه علیہ صلاوة الاله افندمک
حضرتلرینک جلال و جمالی جامع صفات کمال و اوصاف رب متعال
ایله متحلی و ازلاً و ابداً انوار ذات الہیه ایله منور و مشرف
اولان حقیقت کامله لرینی تخیل و استحضار ایتکدر . اکر بوکا
قادر اوله من ایسه ک شونی بیاملیسن که اکمل رسل صلی اللہ علیہ
وسلم افندمک وجودک قدیم و حادثدن عبارت اولان طرفینی
ایله قائم بولنان روح کل اولوب ذات شریفی ذاتاً و صفه جهتیندن
هر برینک حقیقتیدر . زیرا ذات اقدس رسالتپناهیسی نور ذات
حقدن یارادلمش اولمق حیثیتیه ذات حقک اوصاف و افعال و آثار
و مؤثراتی عیناً و حکماً جامعدر .

ای طلبکار سعادت سرمدی ! سکا ذات رسالتپناهیلرینک
صورت و معناسنی علی الدوام ملاحظه یه اهتمام ایتدیگی توصیه ایدرم .
اگر ابتدای امرده بونی استحضارده التزام تکلف ایتسه ک بیله
انشاء اللہ تعالی عن قریب روحک ذات شریفی ایله کسب الفت
ایدرک سکا صلی اللہ علیہ وسلم افندمک عیناً تجالینمای دیدار اولدیغی
حالده ذات شریفی بولورسن . و کنديسیله شرفیاب مکالمه و مخاطبه
اوله رق صحابه کرام رضوان اللہ تعالی علیهم درجه عالیہ سنه یقین
یر مرتبه ده مظهر فوز عظیم اولورسن .

معلومک اولسون که ولی کامل معرفه اللهده بالا پرواز ترقی

و کمال اولدجه جناب حق حین ذکر نده « انا جلیس من ذکر فی »
 حدیث قدسی منطوق جلیله کنیسه جلیس بولدیغندن
 طولانی حال و طورینه برکونه تغیر واضطراب عارض اولمقسزین
 کمال ثبات ایله منبسط و متشکر اولور و مظهر تام الهی صلی الله
 علیه وسلم اقدمزک معرفتده ترقی بولدقجه سید الکونین
 اقدمزی یاد ایتدیکی یعنی صلاة و سلام کتوردیکی اثناده مضطرب
 اولوب اشبو اضطرابک کندوسنده آثار فعلیه سی ظاهر اولور .
 زیرا ولینک جناب حقه اولان معرفتی کنی استعداد و تحمیلی
 درجه سنده اولوب سید الوجود صلی الله علیه وسلم اقدمز اولان
 معرفتی اینسه مبدأ الكل اقدمزک مرأت قابلیتندن متجلی اولان
 معرفه اللهدن متحصل اولدیغندن بوتجلییه و ظهور آثارینه قارشو
 ثبات ایتکه طاقت و قدرت بوله مز .

ولینک سید الاولین و الاخرین صلی الله تعالی علیه وسلم
 اقدمزه اولان معرفتی تزايد ایتدجه دیگر لرندن اکملیتی متحقق
 اولوب کنیسی علی الاطلاق حضرت آلهیه ده نائل مکانت
 و معرفه الله ده زیاده شرفیاب دخالت اولور .

ای بشارت خواهان سعادت ابدیه ! سزه مژده لر اولسون که
 سید الوجود صلی الله علیه وسلم اقدمز حضرتلرینک جمله
 خصائص جلیله لرندن بریده شودر که اولیاء اللهدن هر هانکیسی
 علیه الصلاة والسلام اقدمزی کالات مغویه خلعتلرندن برخلعنی
 کیمش اولدینی حالد تجلیات آلهیه دن برتجایده رؤیت ایتسه
 صلی الله علیه وسلم اقدمز اولدینی خلعتی اوولییه

تصدق واحسان ایدوب اوخلعت جلیله اکا هدیه رسول اولور .
 اکر ولیده قوت و استعداد و ارایسه دارد نیاده فی الحال اوخلعتی
 کیمک ممکن اولور . ولی اوقوتی حائر دکلسه اوخلعت عند
 السیده محفوظ قالوب اوولینک دنیا ده یا آخرتده استعدادی قوت
 بولدینی زمان کنیسه کیدیریلور . بوخلعت هر کیمه میسر
 اولوبده بونی دنیا ده و یا آخرتده اکتسا ایدرایسه جناب پیغمبر
 صلی الله علیه وسلم اقدمزک بو باده کی قوت جلیله سی او ذاته
 ظهور ایده جکندن هر کیم که اشبو ولی بی دنیا ده اوخلعت
 جلیله نبویه بی لابس اولدینی حالد تجلیاتدن برتجایده رؤیت
 ایتسه بو ولی دخی لابس اولدینی اوخلعت جلیله بی چیقاروب
 طرف جایل پیغمبریدن اولمق اوزره رائی ثانییه تصدیق ایدر
 و در حال اوولییه کندوسنک رائی ثانییه تصدیق ایتدیکی خلعتیه
 عوض اوله رق طرف جلیل پیغمبریدن اولکی خلعتدن ده
 مکمل دیگر بر خلعت جلیله منوره نازل اولور . و شو حال بو
 صورتله الی الهایه دوام ایدوب اوولینک اشبو قوتی کندوسنی
 مشاهده ایدن سائر ولیرک هر بری حقنده دأب و عادت اولمقدن
 ابدأ زائل اولمز .

فتح باب مقصود ایچون دیگر بر کیفیت ده واردر که اوده
 صلی الله علیه وسلم اقدمز حضرتلرینک بتون مکنوناتی طولدیرمش
 و احاطه ایتمش اولدینی و بلسکه « ان الله خالق من نوره و خالق الخلق
 من نوری » حدیث شریفی منطوق جلیله کائنات، عین ذات شریفی
 ایدوکنی و کنیسی بر نور محض اولوب سن دخی او نورده محو

و مستغرق اولدیغکی باش کوزک قبالی و قلب کوزک آجیق اولدیغی حالده ملاحظه ایتمک ککدر . بوضورتله سکا اونور شریفده استغراق و محو و غیوبت حاصل اولنجه مقام فنا یله اتصاف ایتیش اولورسن ! فنا فی رسول الله مقامنه نائل اولان کیمسه ذوقیاب محبت رسول اولور .

ایشته ایکی قسمه منقسم اولان تعلق صوریدن بر قسمی بودر . و بونک کیفیتی بالاده ذکر اولندیغی کبی صلی الله علیه وسلم افندمنز حضرتلرینه کمال شوق و محبتله تبعیت ایتمک ککدر ! تا که محبت جلیله سنک جمیع وجود کده ذوقنی بوله سن !

نام پاک الهی به قسم ایدرمکه بن غایت صیجاق بر زمانده فوق الحد صوصامش اولدیغ حالده ایچدیکم صغوق صویک تکمیل اعضا و جوارحه تأثیر و سریانی نصل حس ایدرایسه صلی الله علیه وسلم افندمنز حضرتلرینک محبت جلیله لرینی دخی قابلمده ، روحده ، جسمده ، جالده ، بتون تو یلرمده اووجهله بولوب حس ایدرم .

﴿ استطراد مترجمه ﴾

سیدالوجود صلی الله علیه وسلم افندمنزه تبعیتک وجوبنی تأییداً عبدالغنی النابلسی قدس سره «رسالة العبودیه علی متابعة السنه» عنوانی رساله سننده یازمشدرکه جناب هادی مطلق عبادینی «قل ان کنتم تحبون الله فاتبعونی یحبکم الله» قول جلیله حبیب

ذیشان صلی الله علیه وسلم افندمنزک اتباعنه مأمور بیورمش و محبت الهیه سنی بوتبعیته شرط ایتمشدر . «شرط بولنمنجه مشروط بولنمز» قاعده کلیه سنه نظراً قول ، سنت نبویه به امتثال و تبعیت ایتمکسزین عندی اوله رق اجرا ایلدیکی طاعت و عبادتله هیچ بروقت محبة الله وصول بوله من . عبادات عنده نك فائده بخش اولمی لازم کلسه ایدی معرفه الله و عبادت ایچون انزال کتب و ارسال رساله احتیاج کورنمز ایدی . لکن امر عبودیت ، هرایکسنده محتاجدر . تا که رسل عظام ، کتب منزله دن احکام الهیه ی ناسه تبایغ ایله انلرده او احکام جلیله به توفیق عبادت و بوضورتله حقه کسب قربیت ایلدیلر . زیرا چاب کائنات آفرین جل شانده حضرتلری خالق ، معرفه الله مظهر اولمق و خالقک استدیکی وجهله دکل ذات جلیل الهیسنک اراده سی وجهله عبادت ایتک و ذکر و تسبیح و تقدیسنه چالشمق ایچون خالق و ایجاد بیوردی . بنساء علیه جناب غنی ذی الجلال قوللرینک ایمان و طاعتی انبیاء و رسل عظام علیهم الصلاة والسلام تعریف و هدایتله اولمدقجه قبول بیورمنز و وصلت الهیه سنه یول ویرمنز . انته بو حکمت ازلییه مبیدرکه عبادالله «وما آتاکم الرسول فخذوه و ما نهی عنہ فاتھوا» امر الهیسیله رسول اکرم صلی الله علیه وسلم افندمنزک عباداتدن امر بیوردینی عباداتی ایشلمکه ونهی ایتدیکی معصیتلردن صاقمنغه مأمور اولمشدر .

ایمدی وصول الی اللهی و محبت رسول اللهی استیان کیمسه اعرف الانبیا افندمنزک امر ایتدیکی شیاره امتثال ونهی ایتدیکی

شیردن اجتناب ایتلی و جمیع عبادات و عادات و حرکات و سککات و اخلاق و صفاتنه اتباعه چالشمیدر . زیرا وصول الی الله ، اتباع رسول الله مشروطدر . بناءً علیه هر کیم که رسول الله علیه الصلاة والسلام اقدمزك مشاعر و مآثرینه ، موارد و مصادرینه ، اقوال و افعاله اتباع ایتمزسه طریق اللهده حرمانزده عرفان و ظلمات او هام و عقولده هائم و حیران قالیر ، زیرا جناب الهی عزیز و جلیلدر . دلیله اتباع اولمزسه حضرت قدسیه سنه وصول میسر اولمز .

او دلیل جلیل ده طرق هدایه اعرف دلائل ، و درجات علایه ابلاغ و سائل اولان علی الله علیه وسلم اقدمزدر که سائر انبیا و مرسلین ایله حق سبحانه و تعالی حضرتلری بیننده واسطه اودر . زیرا « کنت نبیاً و ادم بین الماء و الطین » حدیث شریفی و جهله سائر انبیا و مرسل یوغیکن ذات شریفی عالم ارواحده نبی مطلق ایدی . بلکه خالق لایزال ایله جمیع عوالمک خلقی بیننده « لولاک لما خلت الافلاك » حدیث قدسیسی دلالت ایلدیکی اوزره واسطه ، ذات رحمت مأبیدر . حضرت موسی علیه السلام جمله اتباعندن اولمنی تمنی ایتمش ایکن ارتق قننی عاقل اور رسول کریمه تبعیتدن نصل امتناع ایده بیلور ؟

سرور انبیا اقدمز سر اپرده حضرت ذاتیه نک حامیسی و ابواب حضرات صفاتیه نک حاجبی در . نور محمدیسی « اول ما خلق الله اولدیغیچون هر برشی محیط و نور الهی به متصلا در .

نور انبیه ، سر وجود ذاتی و روحانیتیه ، کافه عوالمک ممد حیاتیدر . بنابرین هر کیم که نور بدیع محمدیسیله قریرالین فیض اولمزسه حضرة الله و اصل اوله مز . بونک ایچون حقه کیدن یوللرک طریقت محمدیه و سنت احمدیه دن غیریسی قبالیدر . ایدی وصول الی اللهی استیان کیمسه طریقت محمدیه و شریعت علیه سنه سالک و سنت سنیه سنه متبع و متمسک اولسون . زیرا « من یطع الرسول فقد اطاع الله » آیت جلیله سی حکم منیفنجه رسول الله اتباع ، حقه تبعیت و اکا اطاعت ، الله اطاعتدر .

شو مقدمه مشمول نکاه اذعان اولدقدن صکره معلوم اوله که : مرشد حقایق آموز عالم صلی الله علیه وسلم اقدمزده تبعیت ایکی قسم اوزرینه در . بری اتباع ظاهری ، دیکری اتباع باطنیدر .

(اتباع ظاهری) فرائض الهیه بی ادا ، محارم و مکارهدن اتقا ، اخلاق حمیده ایله اتصاف ، اداب عبودیتله تأدب و اتتلاف ، شهوات دنیا دن ترهد ، مایسوی اللهدن اعراض ، اعمال آخرته میل و اقبال ، فقری اختیار ، استغنا پروران فقرایه و صلاحکاران علمایه محبت و انارک احسان و حرمت و خدمت و معاونتله نظر محبتنی جلب و دعوت . حب فی الله . بغض فی الله .

(اتباع باطنی) مراقبه ، آلاء الهی تفکر ، جناب الهی به عشق و محبت . لقاء الله توجه و اشتیاق ، خوف و رجا ، حق تعالی حضرتلرینه جمیع احوالده حسن ظن ، رضا ، شکر ، تسلیمیت ، حیا ، طریق تقواده ثبات و استقامت ، توکل ، اطمئنان نفس ، ترک هوا . ایله میسر اولور . اشته هر هانکی بختیار شو ایکی

اتباع سلامت انجام ایله اکل رسل و هادی سبل صلی الله علیه و سلم افندمزه تبعیتی قلباً و قالباً قصد و اختیار ایلر و بویولده استطاعتی صرف و ایثار ایدر سه سنی محقق و درجه استعداد و قابلیت کوره « فاولئك مع الذين انعم الله عليهم من النبيين والصديقين والشهداء والصالحين » آیت جلیله سنک متضمن اولدینی صنوف جلیله دن برینه ملحق اولور .

اخطار : شواکی اتباع نجات بخشانک تفصیلات اجراییه سنی عارف اسرار لاهوت شیخ اکبر قدس الله سره الاظهر حضرت تلیرنک فتوحات مکیه سنک خاتمه سی اولان کتاب و صایا جامع بولمنش و کتاب مذکور لسان عربی به آذربیح و قوفی اولانلرک اکلایه جنی یولده سهل العبارة اولمقله برابر تسهیلاً للطالبین فتوحات مکیه دن آیروجه اوله رق مکة مکرمه مطبعه سننده طبع و تمثیل ایدلمش اولدیغدن طالب حق اولانلرک کتاب مذکور مطالعیه مسارعتلری خالصاً لوجه الله اخطار اولنور . انتهى

ای طالب حق ! یوقاریدن بری بیان ایلدیکم و صایا و تبلیغاتی حسن تاقی و قبول ایله ! زیرا محبوب خدا علیه افضل التحایا افندمزک محبت جلیله لری « النبی اولى بالمؤمنین من انفسهم » نص جلیلی و « لَا يُؤْمِنُ أَحَدُكُمْ حَتَّىٰ أَكُونَ أَحَبَّ إِلَيْهِ مِنْ نَفْسِهِ وَمَالِهِ وَوَالِدِهِ وَوَلَدِهِ » حدیث شریفی دلالت علیه سنجه هر بر مؤمنه فرض عیندر .

وصف و تعریف اولسان محبتی کندگده یوله من ايسرهك معلومك اولسون که ایمانکده ضعف و نقصان واردر . بو حالده جناب حقه یانوب یا قیلوب و استغفار و تضرع ایدوب کناعلرکدن توبه ایتملیسن . و جناب پیغمبر صلی الله علیه و سلم افندمزک کمال تأدبیه صلاة و سلامنه کمال حرص و شوق ایله دوام کوسترملیسن . و اوامر جلیله سنی حسن اجرایه چالیشوب نهی و منع بیوردقلری شیردن صاقملیسن که بو محبته نائل اولوب شفیع اعظم افندمز حضرت تلیریله برابر محشور اولمق شرفی احراز ایدمسن . زیرا صلی الله علیه و سلم افندمز حضرت تلیری « المرء مع من احب » بیورمشدر که معنای جلیلی انسان سودیکی کیمسه ایله برلکده در دیمکدر . اوت ، سن فنا فی رسول الله مقامنده تحقق ایدنجه اشبو فنادن فنا بولمالیسن مقام محمود بودر . اشته اوزمان ملاحظه ایتمکده اولدیغک نوردن ظاهر اولان صورتک کندوسنه افاضه ایتدیکی شیء اوزمان ملاقی اولورسن و بونک کیفیتی شو وجهله در که جناب پیغمبر صلی الله علیه و سلم حضرت تلیرینه حین توجهکده سن کندک دکل ذات رسالتیناهیسنک کندی نفس نفیس اقدسارینه متوجه اولدیغنی ملاحظه ایلملیسن و سن ذات جلیل پیغمبریده محو و متلاشی اولملیسن . و کذلک صلی الله علیه و سلم حضرت تلیرینه صلاة و سلام ایتدیگک زمان دخی اویله ملاحظه ایتملیسن که صلاة اوقویان سن دکلسن بلکه کندی ذات جلیلی در . زیرا جمیع اشیا صلی الله علیه و سلم افندمزک نور بدیع و جیلندن یارادلمشدر . و ذرات کائناتدن هر بر ذره ده سیدالوجود افندمزدن بررققه یعنی بر سر

متمد و اردرکه اور قيقه فيضر سان امتداد اولديني مظهرك قوت
وقابليتي حسييله تظاهر ايدر .

سن دخی اشیادن بر شقی اولدیغك حیثیتیه سنده ده علیه الصلاة
والسلام اقدمزدن بر رقیقه و اردرکه اتناى توجهکده ذات جلیل
محمدیسنه متوجه اولان ایشته سنده مستور و مکنون اولان
اور قیقهدرکه توجهك نسبتنده سنی احاطه و استیلا ایتکده دوام
ایدر . حتی که کندك صلى الله عليه وسلم اقدمز حضرتلرنده محو
و مستغرق اولورسن و كذلك سنی بر مقامدن دیگر بر مقامه نقل
و ترقی ایتدیرر تا که جناب حق سنی بقا بر رسول الله مقامنه نقل
ایدر . بو حوالده سن کمالات مصطفویه بی جامع و فیض حقیقت
محمدیه به وارث بر انسان کامل اولورسن .

ای سالك راه حقیقت ! جناب حقك سكا احسان و اعطا
ایتدیكى نعمتدن طولای حمد و شكر ایدرك طالب مقام عبودیت
و مستغرق دریای احدیت و عارف تفرعات و احدیت بر عبد خالص
اول و یارب سنك ذات جلیلکده اولان حیرتمی زیاده قیل .
مناجاتی متضمن اولان « رَبِّ زِدْنِي فَيْكَ تَحْيَرًا » حدیث شریفی
منطوق جلیکجه صاحب حیرت محموده اولمغه چالش . انتهى

عارف مشارالیه ینه رساله مذکوره سنك « المشهد الرابع »
عنوانیه معنون و شبکه شریفه ايله منبر منیف اراسنده ظهور ایدن
بر واقعیه بین اولان محلنده شویله یازمشدرکه : منبر شریفك
قارشوسنده واقع مر مردن مصنوع مؤذن محفل یاننده او تور مقده

ایدم . نا کهان بر نور ، بر توافشان ظهور اولوب تعلینای وجود
اولدی . اوصره ده کویا المده بخاری شریف کتابی و ارایدی .
فقط بو کتاب جلیل بیلدیکنز شکل و هیئته اولیوب تعریف
اولنمز بر رونق و لطافتی حائر ایدی . یازوسی ناقابل توصیف
اولوب شو قدر دیه بیلورمکه خامه بدیع قدرته یازلمش ایدی .
حجمی بك بيوك ایدی . بوتجلی اراسنده کتاب مذکوره امعان
نظر تعجب ایتکده ایدم .

دیرکن اونور عظیم نظر کا همك فوقنده هر طرفی احاطه
و استیلا ایلدی . متعاقباً حقیقت محمدیه تجلینای ظهور و نور جلیل
احمدی طلعتنای چشم شعور اولدی . ایشته بوتجلیده المنه لله
تعالی و تقدس صورت نوری رؤیت و اونور بدیع اللمعاندن
صورت شریفه محمدیه بی مشاهده ايله روشنظر سعادت اولدم .
حالت یقظه به رجوعمدن صکره مشاهد سیله مشرف اولدیغم
او صورت جلیله بر خیلی زمان پیش نظر مده باقی قالوب کیجه
و کوندوز کوزمدن غائب اولدی . انتهى

رساله مذکوره دن مقصود منزه متعلق اولوب بورایه نقل
اولنان اشوب بحثلر طالب و مسترشد ایچون کافیدر .

سید الوجود صلى الله عليه وسلم اقدمز حضرتلر ینه شرفیاب
قرب و وصول اولمق اسباب و وسائلنك الك بیوکلرندن بری دخی
اول حیب اعظم کبریا اقدمزك سرائر خانه ملکوت ارای فیض
و کالنه واصل و قبله الاقبال ارواح اولان ذات شریفه محمدیه سنه

کلیتله مقبل یعنی قولاً وفعلاً و حالاً و خالقاً سنن سنیه سنه متوسل
والحاصل رهنمای سر منزل طریقت جلیله سی اولوب عند
رسالتپناهیسنده نعمت قرب و قبوله نائل اولان روشندلان انوار
حقیقتک فیض صحبتدر .

جناب حق تقدست ذاته حضرتلری قرآن مجیدنده « یا ایها الذین
آمنوا اتقوا الله وكونوا مع الصادقين » بیوزمشدرکه معنای جلیلی :
« ای مؤمنلر . جناب حقندن اتقا ایدیکلر ! وصادقلر ایله برلکده
بولنککلر ! » دیمکدر . ایمدی جناب حقک قوللرینی صادقلر ایله
بولنککلر خطابی ایله مقام صدقه ارشاد و دعوتی انجق اشبو مقام
نجات انجماک ، ابواب جود و کرم آلله یسنک مفتاحی و ذات صمدانیسی
ایله رسول جلیلک صحبت و مشاهده سنک وسیله موجب الفلاحی
اولدیغی ایچونددر .

جناب پیغمبر صلی الله علیه وسلم اقدمز حضرتلرینک « المرء
مع من احب » و « المرء علی دین خلیله فلینظر احدکم من بخال »
حدیث شریفاری دخی بوکادالالت ایدرکه برنجیسنک معنای شریفی
« کشی سودیکی ایله برابردر » وایکنجیبسنک مدلول عالیسیده
« انسان دوستک دینی اوزره در . ایمدی باقیککلر ! کیمله
دوستلق ایتککلر لازم کلور ؟ » دیمک اولور . عبدالکریم کیلانی
قدس سره حضرتلرینک شوابیات جلیله سی دخی بومعنایی
مشعرددر .

بعض دفعه ده بالعکس جهت اختلاف ، مابه الاتحاد اوزرینه
او مرتبه قوت بولورکه شخصینک اجتماعی ممکن اولیه جق صورتده
تنافر و ضدیت وجود بولور .

حاصلی هرکیم موضوع بحث اولان اصول خمسہ یی تحصیل
و استکمال ایلرسه کندیسیله عرفان پروران غیب و شهوددن
یکمیش اولان کمل اعزّه کرام نورالله تراهم حضرتانک ارواحی
اراسنده مناسبت ، ثابت اولوب دیلیدیکی زمان انلرله برلشیر .

شیخ احمد الصاوی قدس سره صلوٰۃ الدردیرک « اللهم صل
وسلم وبارک علی سیدنا محمد وعلی آله » « وارزقنا بسبب الصلوة
علیه لذة وصاله » جمله لرینک شرحنده : لذت وصال ، قرب
رسالتپناهیدن کنایت اولدیغنی و بوحالده جمله اخیره نک معناسی :
« یارب حبیب ذیشانک اقدمزله ارامزده کی حجابلرک زوالی
سببیه قرب رسالتپناهیسنه موفق بیور ! » دعاسندن عبارت
بولندیغنی بیان ایلدکدن صکره دیمشدرکه : رسول کبریا علیه
افضل التحایا اقدمزری شهود ، اهل الله ایچون منتهای مقصود
اولوب بو حکمته مبنی ابوالحسن الشاذلی رضی الله عنه « لو غاب
عنی رسول الله طرفه عین ماعدت نفسی من المسامین » یعنی
جمال جمیل حبیب خدا بر لحظه دیده شهودمدن غائب و نا پیدا
اولسه کندمی مسلمیندن صایمازدم دیر ایدی .

بدایعنا ی اسرار ملک صوری و معنوی قطب العارفین حضرت
سید احمد بدوی قدس الله سره القوی دخی بومعنای توحید
احتوایی تنویراً :

وَلَوْ غَابَ عَنِ الْمَصْطَفَى لِحَظَةٍ لَمَّا حَكَمْتُ بَانِي مُسْلِمٍ فِي عَقِيدَتِي

بیتله سالکان طریقتی بهر دمند اتباع بیور مشدر .

وامام بوصیری رضی الله عنه قصیده مشهوره همزیه سنده :

لَيْتَهُ خَصَنِي بِرُؤْيَا وَجْهِ زَالَ عَنْ كُلِّ مَنْ رَأَاهُ الشَّقَاءُ

دیمشدر که مدلولی : جناب حق تولیدی بنی بروجه جمیلک

رؤیت جمالیه قریرالین اختصاص بیورهیدی که او روی منیر

فیضا فیضی کورنلرک هپسندن شقاوت زائل اولور .) دیمکدر .

وامامه سبحة سادات وفائیه قطب العارفین سید علی وفا رضی الله

عنه دخی :

قَدْ كُنْتُ أَحْسَبُ أَنْ وَصْلَكَ يَشْتَرِي

بِكِرَائِمِ الْأَمْوَالِ وَالْأَشْبَاحِ

وَضَنْتُ جَهْلًا أَنْ حَبْكَ هَيْنَ

تَغْنِي عَلَيْهِ نَفَاسُ الْأَرْوَاحِ

حَتَّى رَأَيْتُكَ تَجْتَبِي وَتُخَصُّ مِنْ

أَحِبَّتِهِ بِلَطَائِفِ الْأَمْنَحِ

فَعَلِمْتُ أَنَّكَ لَا تُنَالُ بِحِيلَةٍ

وَلَوْ لَيْتَ رَأْسِي تَحْتَ طَيِّ جَنَاحِي

وَجَعَلْتُ فِي عَشِّ الْغَرَامِ أَقَامَتِي

أَبَدًا وَفِيهِ تَوَطَّنِي وَرَوَّاحِي

بیور مشدر که مالا ترجمه منظومه سی بودر .

اشترای جوهر و صلتک صانوردم رایکان

بذل مال و جسم ایله ای باری کون و مکان

جهل ایله تخمین ایدردم عشقکی امری سیر

کر ایدر سهم راه فیض کده فدا، روح روان

تاسنی کوردم که و صلتک چون ایدر سین اصطفای

هر کیمی سود کسه لطف کاه ازده بی کمان

اکلادم تدبیر له ممکن دکدر و صلتک

باشمی چکدم جناحم الته بی این و آن

لانه عشقی اقامتگاه ایدندم کندمه

انده در آرام جانم انده در آرام جان

معلوم روشندلان حقیقتدر که قریرالین دیدار پاک محمدی
اولنر روشنظر نور جمال احدی اولمش دیمکدر . زیرا تجلیگاه
حقیقت بر در . کیمکه وسیله یه بالغ اولورسه ، مقصدی کورمش
اولور . بویکی شهودك اراسنده فرق کورن کیمسه نعمت جمال
وحدانیت کبریا ولدت معرفت انیادان ذوقیاب اولمامشدر .
عارفلر، علو همتلرینی الله تعالی حضرتلرینک ورسول کریمی
صلی الله علیه وسلم اقدمزك نشوة محبته ظفریاب اولمق یولنده
صرف وایشار ایلدیلر .

بوسعاده وصول مقصدیه مشارالیهمدن بعضیسی امام برعی
و بوسیری رضی الله عنهما کبی وسیله رحمت مولا علیه اکل التحایا
افدمز حقنده و بعضیسیده ابن فارض قدس الله سره و امشالی
کبی مقصد اصلی صددنده و کیمیده سید علی ابن وفا رضی الله عنه
کبی هرایکی مقامده اشعار عاشقانه ایله ناطقه پیرای توحید اولدیلر .
هپسنگ نقطه نظری اینسه جهت وحدته منعطفدر . انتهى

مظهر جمال حق صلی الله علیه وسلم اقدمزه وصولك
اسبابندن اك بیوکی، حبیب کبریا علیه اکل التحایا اقدمزك
خیال عذیم المثلک همیشه پیش نظر بصیرتده استقرارینه قدر
کندیسنه کثرتله صلاة وسلام ایدرك صفات جلیلهسنه تعاق
حاصل ایتمکدن عبارت اولدیغیچون دلائل الخیرات مؤلف
کالاتروری رضی الله عنه روضه شریفه نك صورت مقدسه سنی
دلائل الخیرات ایچنه نقش و وضع ایلدی که روضه مطهره دن
اوزاق اولان کیمسه ، صلاة وسلام او قودینی وقتده روضه

شریفه نك صورتندن حرمخانه عرش آستاننده مضجع آرای
رحمت اولان صلی الله علیه وسلم اقدمزك تصویرینه انتقال ایلیه .
کثرت صلاتله برابر بوتصوری تکرار ایتدجکه مخیل ، محسوس
درجه سنی بولور . اصل مقصود دخی بو جهتدر . عارفیندن
بری نظم آتی ایله بومعنايه اشارت بیورمشدر .

﴿ نظم ﴾

فروضتك الحسنی منای و بغیتی

وفیه شفا قلبی و روحی و راحتی

فان بعدت عنی و شط مزارها

فتمثالها عندی باحسن صورة

وها انا یاخیر النیین کلهم

اقبلها شوقاً لاطفاء غلتی

مألاً ترجمة منظومه سیدر :

روضه قدسکدر! انجق مطلبم کیم انده در

کو کلمك محض شفا سی، الشراحي، راحتى

دورایسه بندن نوله اول مطلع الفیض وجود
احسن تمثال ایله وارددر یا نمده صورتی

پوسه چین اشتیاقم ایشته اول تمثالدن
دمبدم اطفای چون سوز فراق و حسرتی
بومعاده اولان شور باعی دخی پک لطیفدر :

اذا ما الشوق اقلقنی الیها
ولم اظفر بمطلوبی لیدیها

نقشت مثالها فی الکف نقشاً
وقلت لناظری قصرّاً علیها

﴿ مالا ترجمه منظومه سی ﴾

اشتیاق روضه ک ایتدجه بنی مشتاق وزار
بولسه هم یوز سورمه که ای نورمولا، اقتدار

نقش ایدوب ال آیه مه مثلن، دیرم ای کوزلرم
اشبو نقشه ایلک قصر نکاه اعتبار

نبی اکرم صلی الله علیه وسلم اقدامزه کثرت صلاتدن مصلی
ایچون نفع و ثواب حاصل ایسه ده عارف لک کثرت صلاته دوامدن
مقصدی بودکلدر .

عارف بالله شیخ الدمر داش رضی الله عنه مقصد عارفینی
بیان ایچون شوبیتی نه کوزل سویلمشدر :

لیس قصدی من الجنان نعیماً
غیرانی اریده ها لاراک

﴿ ترجمه سی ﴾

مقصدم نعمت دکل جتدن ای رحمت مأب
آنده کورمکدر همان دیدار پا کک بی حجاب

عمر ابن الفارض نفعنا الله به سر نهاده بالین احتضار اولوبده
غطاء بشریت انکشاف پذیر حقیقت اولدینی دم واپسینده
رحمتسرای بهشته کندیس، چون حاضر نمش اولان نعم الیه بی
مشاهده ایدنجه ناطقه پیرای استغنا اولدینی شوبیت دخی معنای
مبحوث عنیهی متضمندر .

ان کان منزلتی فی الحب عندکم
ما قد رأیت فقد ضیعت ایامی

مدلولی : الہی ، محبت خصوصندہ تجلیسرای رحمت
صمدانیہ کدہ مرتبہ و منزلتم شو کوردیکم نعمتزدن عبارت ایسہ
تحقیق تضییع ایام ایتشمدر . زیرا بنم مطلم مجرد روشننظر
جمال عذیم المثلک اولمقایدی « دیمکدر .

طریقت احمدیہ شاذلیہ نک ورد مخصوصی اولوب فضیلت
ومزیتی بالادہ خامہ کذار بیان اولان صلاة عظیمیہ بی بومقامدہ
ذکر ایلہ تبرک ایدرز . زیرا صلاة جلیلہ مبحوۃ قطب دائرہ
تقدیس سید احمد بن ادريس حضرتلرینک « کنوزالجواهر
النورانیہ فی قواعد الطریقة الشاذلیہ » آدورسالہ سندہ ذکر و بیان
وشیخمنز ابراہیم الرشید قدس اللہ سرہ طرفدن باندفعات بزہ
حکایہ واتیان بیورلدینی وجہلہ مرشد طریق ہدی صلی اللہ علیہ
وسلم افندمز ، تعلیم کردہ سبحانی ومظہر حیات جاودانی اولان
خضر علیہ السلام برابرندہ بولندینی حالہ اذکار طریقت شاذلیہ بی
تلقین بیوردقدن صکرہ فم حقائق آموز رسالتپناہیسندن مشارالہ
سید احمد بن ادريسہ تلقین بیوردینی وطالب اولنلرہ تلقیننی
امر ایتدیکی برصیغہ عظیمہ در .

صلاة شریفہ مبحوۃ نبی اکرم صلی اللہ علیہ وسلم افندمزہ
وصولہ واسطہ اولان وسائلک اک بیوکلرندندر . بوسعادتی
صلاة مذکورہ نک عبارة اخیرہ سیدہ مبشردر . شوراسیدہ
معلوم ومحققدرکہ مؤمنندن برچوق بختیاران . بوصلاة شریفہ بیہ
دوامہ موفقیتلری سبیلہ فیضیاب وصول حیب رحمان
اولمشاردر .

﴿ صلات شریفہ مذکورہ اشته ثبت صحیفہ ﴾
﴿ تعظیم قلندی ﴾

اللهم انی اسئلك بنور وجه الله العظيم الذي ملأ اركان
عرش الله العظيم وقامت به عوالم الله العظيم ان تصلي على
مولانا محمد ذي القدر العظيم وعلى آل نبی الله العظيم
بقدر عظمة ذات الله العظيم في كل لمحۃ ونفس عدد ما في
علم الله العظيم صلاة دائمة بدوام الله العظيم تعظيماً لحقك
يا مولانا يا محمد يا ذا الخلق العظيم وسلم عليه وعلى آله مثل
ذلك واجمع بيني وبينه كما جمعت بين الروح والنفس
ظاهراً وباطناً يقظة ومناماً واجعله يارب روحاً لذاتي
من جميع الوجوه في الدنيا قبل الآخرة يا عظيم .

بوصلاة شريفه نك سمو مكات و علوشان و مزيتده نظيري
آينه عزت كبريا عليه افضل التحايا افندمرك مشاراليه سيد احمد
ابن ادریس رضی الله عنه مذکور صلاة شريفه ايله برابر تلقين
و طالبان حقه تعليم ايتمسي امروتنیه بيوردیگی تهليل جليلدرکه
اوده شو جمله توحيد اشتمالدر : « لا اله الا الله محمد رسول الله
في كل لحة و نفس عدد ما وسعه علم الله » .

شيخ كامله ز روشن نظر نور توحيد، حضرت ابراهيم الرشيد
ديرايدی که : نبی ذیشان عليه صلواة الرحمن افندمرك بوتهلل
شريف حقنده غوث الواصلين احمد بن ادریس رضی الله عنه
خطاباً « خزنتها لك يا احمد لم يسبقك من لدن آدم احد علمها
اصحابك يسبقونها الاوائل » يعنى يا احمد جوهر يكتای سعادت
اولان بوكلمه جايلاه يي سنك ايچون خزينه سرائر ازليده صاقلادم
آدم عليه السلام دنبرو بويلاه برتهليل ايله سنی افراد آفریده دن
کيمسه ساحه پهنای توحيدده کچمدی آنی اصحابنه تعليم ايله که
انلر اسلافی سبق اياسونلر . حاصلی صلاة عظيمه رسول الله
صلی الله عليه وسلم افندمرك يا قلاشديران بر صيغه جليله اولديغی
کي بوتهلل شريف دخی وصلت جناب مولايی موجب اولان
اوراد منيفه دندر .

﴿ خاتمه ﴾

الله عظيم الشان جلت عظمتہ حضرت تيرينك رسول كريمی

وحبيب امينی برکت و حرمتہ بزم وكافه مؤمنينك حسن خاتمه يه
موقيتيمزى بارگاه رحمت الهيه سندن نیاز و تضرع ايلرز .

معلوم اوله که يوقايدن برو ذکر و بيان ايتديكمز سعادت
سرمديهيه وصول ايچون سيف قاطع و قول جامع، سبب آفرينش
عالم صلى الله عليه وسلم افندمركه محبتدر . زيرا محبت، اصل الاصول
ولب معقول و منقولدر . سادات صوفيه قدس الله اسرارهم
ديديلر که : استعداد پروران مریدانك سيراب عرفان الهی
اولمق ايچون آب زلال معارف واسرار طالدير دقلى آوانی
صفوت مجرد فرط مهربانى و محبتدر .

محبتی جلب و تزويد ايدن تدابير ايسه سويلان شيدك محاسن
وفضائلی تذکر و تأمل و انك اوصاف مرغوبه سندن ممکن
اوله بيلتنه تعلق و توسلدر . ايشته صوفیه کرام عندنده رابطه
دنیلان شی بوتعاقدن عبارتدر . حضرت حسن بن علی رضی الله
عنهمانك شفاء شريفده مندرج اولوب « خال محترم هند رضی الله
عنهی حلیه حبيب كبريا عليه افضل التحايا دن سؤال ايلدم . زيرا
کندیسی و صاف رسول الله ایدی . امید ايلرم که حلیه شريفه سندن
تعلق ایده بيله جکم برشی بکا وصف ايدر » مألنده اولان :
« سألت خالي هندا عن حلية رسول الله صلى الله عليه وسلم وكان
وصافاً وانا ارجو ان يصف لي منها شيئاً اتعلق به » حديث شريفی
ايلهده بوتعلقك صحت شرعيه سی مثبتدر .

معلوم اوله که نبی ذیشانمز حبيب اديب كبريا عليه افضل التحايا
افندمركه صفات برکزيده دن افضل و اکرمی و اخلاق حميده دن

اشرف واعظمی اعطا بیورمشدر . نته کیم جناب علیم لم یزل
قرآن کریمنده « وائک لعلی خلق عظیم » ثنای الهیسیله بو حقیقته
شهادت بیورمشدر .

سیدکائنات افندمزه صورت شریفه سی صور جمیله نکه اک
کوزلی ، وسیرت جلیله سی اصحاب توارنج و سیرک اتفاقیه سیرت لک
احسن وافضلی ایدی . اعزّه کرامدن بری فضل رسول اکرم
حقنده :

الفضل کان موزعاً بین الوری

فجمعت فی ذاته اشتاتاً

بیته نه کوزل سویامشدر . مأل لطیفی : « فضل وکمال وحسن
وجمال ذات شریفه محمدیه سنک اجزای نورانیه سندن عبارت
اولان کائناته منقسم اولدینی حالده او کوزلر کوزلی وجناب
حقک حبیب بی بدلی افندمزه صورت ناسوتیه سنده تجمع
ایلدی . » دیمکدر .

امام بوصیری قدس الله سره دخی :

دع ما ادعته النصاری فی نبیهم

واحکم بما شئت مدحاً فيه واحتکم

بیته بو حقیقته برطرز لطیفه تأیید ایلمشدر . معناسی : « ای
مدایح سرای حبیب خدا نصارانک حضرت عیسی علی نبینا وعلیه
افضل التحایا حقنده دعوا ایلدیکنی ترک ایله یعنی تکریدر دیمه

واللهک شریکیدر و اوغلیدر کبی باطل دعوالردن برنده بولمه ،
اندن بشقه نبی ذیشانمزه وصف و ثنای حقنده هر نه سویلر سهک
سویله و هر نه حکم ایلر سهک ایله و بو مدخ و حکم کده تحکم نمای
ثبات اول « دیمکدر .

ایمدی صفات جلیله رسالتپناهی صوریه ، سیریله ، روحیه .
عنوانلریله اوچ قسمه منقسمدر .

صفات روحیه سی مبدأ فیض وجود صلی الله علیه وسلم
افندمزدن مروی اولوب « نبی ربمدن غیری حقیقت ادراک ایله
کیمسه ادراک ایتمدی » مألده اولان « لم یدرکنی حقیقه غیر ربی »
حدیث شریفی دلالت ایلدیکنی وجهله صفات روحیه سی حد حصر
و ادراکدن خارجدر .

واسطه رحمت مولا علیه افضل التحایا افندمزه صفات
روحیه سنه تعلق ایتمک ایستیان هدا جویان حقیقت ایچون سید
احمد بن ادریس قدس سره النفیس حضرت لرینک احزاب شریفه سی
خاتمه سنده آرایش صحیفه سطور اولان اون درت صلوات جلیله
کافیدر . صلوات شریفه مذکوره حقیقت ازلیه محمدیه سنه نسبتله
بربنده دن عبارت ایسه ده اکا وصول و تعلقه طالب و مرید اولان
کیمسه ایچون ان شاء الله تعالی اعظم وسائل و اکرم وسائلنددر .

شیخمزا ابراهیم الرشید قدس سره حکایه بیوررکه اولیاء الله بدن
برذات واقعه ده مشول حضور سید کائنات اولوب دهان معجز
بیان رسالتپناهی سندن « بنم حقیقتم صحیفه بیانه یازیله مز ؛ یازلمق
لازم کلسه یدی بعض صلوات سنده « اللهم صل علی طامه الحقائق
الکبری سر الخلوۃ الالهیه لیله الاسری » دیش اولان او غلم احمد

یازمغه موفق اولورایدی « مألده برسوز ایشتمشدر . شاعر
خاص محبوب خدا حضرت حسان رضی الله عنه المنان حضرت تکرینک
مدح رسول کریم حقنده :

له هم لا منتهی لکبارها

وهمته الصغری اجل من الدهر

له راحة لو ان معشار جودها

على البرکان البراندی من البحر

قطعه سی نه لطیف و بایغدر . معناسی : « رسول اکرم صلی الله
علیه وسلم اقدمک اویله همتلری واردرکه بونلرک بیوکلری ایچون
نهایت تصور اوله ماز . اک کوچک همتی ایسه زمان آفرینشدن
قیامته قدر متمد اولان زمان مدیدک فعالیتدن دها بیوکدر .
برراحة لطف و کرمه مالکدرکه انک جود و سخاسنک بیکده بری
قره یه نشار اولنسه فسحتسرای بر ، بحر بی پایاندن فیاض تر
اولورایدی « دیمکدر .

صفات صوریه و سیرییه سی ایسه جداً پک چوقدر . لکن
« چوغی ادراک اولنمیان شیئک آزی ترک اولنماز » مثلنجه صفات
جليله مبحوثه سنک بیانی صدندده سبط مکرم نبی حضرت حسن
رضی الله عنهدن روایة قاضی عیاض علیه رحمة الفیاض
حضرت تکرینک کتاب جلیل شفاده ذکر ایتدیکی حدیث شریفی
سرد و اتیان ایله بورساله مزری مسکی الحتام ایلرز .

حلیه جلیله حیب کبری علیه افضل التحایا [۰] -

قال الحسن بن علی رضی الله عنهما سألت خالی هند ابن ابی
هالة عن حلیه رسول الله صلی الله علیه وسلم وکان وصافاً وانا

ارجو ان یصف لی منها شیئاً اتعلق به قال کان رسول الله

صلی الله علیه وسلم فخماً مفخماً ، يتلأأ ووجهه تلاءأ

القمر لیلۃ البدر ، اطول من المربع واقصر من المشذب ،

عظیم الهامة رجل الشعر ، ان انفرقت عقیقه فرق والا فلا ،

یجاوز شعره شحمة اذنیه اذا هو وفر ، ازهر اللون ،

واسع الجین ، ازج الحواجب ، سوابغ من غیر قرن بینهما

[۰] حلیه جلیله رسول اکرمی متضمن اولان اشبو حدیث شریف
هر هانکی مصاب و خسته نک اوزرینه اعتقاد تام ایله قرائت اولنورسه
باذن الله تعالی شفا وفاقه بوادینی تجر به کرده روشندلان امتدر .

عرق يدره الغضب ، اقنى العرين له نور يعلوه يحسبه
 من لم يتأمله اشم ، كثر اللحية ، ادعج ، سهل الحدين ،
 ضليع الفم ، مفلج الاسنان ، دقيق المسربة ، كان عنقه
 جيد دمية في صفاء الفضة ، معتدل الخلق بادناً متماسكاً ،
 سواء البطن والصدر ، بعيد ما بين المنكبين ، ضخيم
 الكراديس ، انور المتجرد ، موصول ما بين اللبة والسرة
 بشعر يجري كالخط ، عارى الثديين والبطن مما سوى
 ذلك ، اشعر الذراعين والمنكبين واعالى الصدر ، طويل
 الزندين ، رحب الراحة ، شثن الكفين والقدمين ،
 سائل الاطراف ، خمضان الاخمصين ، مسيح القدمين ينبو
 عنهما الماء ، اذا زال زال ثقلها ويخطو تكفياً ويمشى

هوناً ، ذريع المشية اذا مشى كأنما يخط من صلب ،
 واذا التفت التفت جميعاً ، خافض الطرف نظره الى الارض
 اطول من نظره الى السماء ، جل نظره الملاحظة ، يسوق
 اصحابه ويبدر من لقيه بالسلام ، قلت صف لى منطقه
 قال كان رسول الله صلى الله عليه وسلم متواصل الاحزان
 دائماً الفكرة ليست له راحة ، ولا يتكلم في غير حاجة ،
 طويل السكوت ، يفتح الكلام ويختمه «باسم الله» ويتكلم
 بجوامع الكلم فصلاً لا فضول فيه ولا تقصير ، دمثاً ليس
 بالجافى ولا بالمهين يعظم النعمة وان دقت لا يذم منها
 شيئاً لم يكن يذم ذواقاً ولا يمدحه ولا تغضبه الدنيا ولا
 ما كان لها ، فاذا تعدى الحق لم يقم لغضبه شئ حتى ينتصر له

وَلَا يَغْضِبُ لِنَفْسِهِ وَلَا يَتَصَرَّ لَهَا ، إِذَا أَشَارَ أَشَارَ بِكَفِّهِ
 كُلِّهَا وَإِذَا تَعَجَّبَ قَلْبُهَا وَإِذَا تَحَدَّثَ اتَّصَلَ بِهَا فَضْرَبَ
 بِأَبْهَامِهِ الَّتِي رَاحَتَهُ الْيَسْرَى وَإِذَا غَضِبَ أَعْرَضَ وَأَشَاحَ
 وَإِذَا فَرِحَ غَضَّ طَرْفَهُ ، جَلَّ ضَحْكُهُ التَّبَسُّمُ وَيَفْتَرُ عَنْ
 مِثْلِ حُبِّ الْغَمَامِ ،

قَالَ الْحَسَنُ فَكُتِّمْتُهَا عَنْ الْحُسَيْنِ بْنِ عَلِيٍّ زَمَانًا
 ثُمَّ حَدَّثَهُ فَوَجَدْتُهُ قَدْ سَبَقَنِي إِلَيْهِ فَسَأَلَهُ عَمَّا سَأَلْتُهُ عَنْهُ
 وَوَجَدْتُهُ قَدْ سَأَلَ أَبَاهُ عَنْ مَدْخُلِ رَسُولِ اللَّهِ صَلَّى اللَّهُ
 عَلَيْهِ وَسَلَّمَ وَمَخْرَجِهِ وَمَجْلِسِهِ وَشَكْلِهِ فَلَمْ يَدَعْ مِنْهُ شَيْئًا ،
 قَالَ الْحُسَيْنُ سَأَلْتُ أَبِي عَنْ دُخُولِ رَسُولِ اللَّهِ صَلَّى اللَّهُ
 عَلَيْهِ وَسَلَّمَ فَقَالَ كَانَ دُخُولُهُ لِنَفْسِهِ مَأْذُونًا لَهُ فِي ذَلِكَ

فَكَانَ إِذَا أَوَى إِلَى مَنْزِلِهِ جِزءٌ دُخُولُهُ ثَلَاثَةٌ أَجْزَاءٌ جِزءٌ لِلَّهِ
 وَجِزءٌ لِأَهْلِهِ وَجِزءٌ لِنَفْسِهِ ثُمَّ جِزءٌ جِزءُهُ بَيْنَهُ وَبَيْنَ النَّاسِ
 فَيَرُدُّ ذَلِكَ عَلَى الْعَامَّةِ بِالْخَاصَّةِ ، وَلَا يَدْخُرُ عَنْهُمْ شَيْئًا فَكَانَ
 مِنْ سِيرَتِهِ فِي جِزءِ الْأَمَةِ إِشَارَةُ أَهْلِ الْفَضْلِ بِأَذْنِهِ وَقِسْمُهُ
 عَلَى قَدْرِ فَضْلِهِمْ فِي الدِّينِ ، فَمِنْهُمْ ذَوَا الْحَاجَةِ وَمِنْهُمْ
 ذَوَا الْحَاجَتَيْنِ وَمِنْهُمْ ذَوَا الْحَوَائِجِ ، فَيَتَشَاغَلُ بِهِمْ وَيَشْغَلُهُمْ
 فِيمَا يَصْلَحُهُمْ وَالْأَمَةُ مِنْ مَسْئَلَتِهِمْ عَنْهُ وَاخْتِيَارِهِمْ بِالَّذِي
 يَنْبَغِي لَهُمْ وَيَقُولُ لَهُمْ «لِيَبْلُغَ الشَّاهِدُ مِنْكُمْ الْغَائِبَ وَابْلُغُونِي
 حَاجَةً مِنْ لَا يَسْتَطِيعُ ابْلَاغُهَا فَإِنَّهُ مِنْ ابْلَاغِ سُلْطَانًا حَاجَةً
 مِنْ لَا يَسْتَطِيعُ ابْلَاغُهَا ثَبَّتَ اللَّهُ قَدَمِيهِ يَوْمَ الْقِيَمَةِ» وَلَا يَذْكُرُ
 عِنْدَهُ إِلَّا ذَلِكَ وَلَا يَقْبَلُ مِنْ أَحَدٍ غَيْرِهِ يَدْخُلُونَ عَلَيْهِ

روادا ولا يفرقون الا عن ذواق ويخرجون ادلة يعنى
على الخير ،

قال فسأله عن مخرجه كيف كان يصنع فيه قال
كان رسول الله صلى الله عليه وسلم يخزن لسانه عما لا يعنيه
و يؤلفهم ولا يفرهم ويكرم كريم كل قوم ويؤليه
عليهم ويحذر الناس ويحترس منهم من غير ان يطوى
على احد منهم بشره ولا خلقه ويتفقد اصحابه ويسأل الناس
عما فى الناس ويحسن الحسن ويقويه ويقبح القبيح
ويوهنه معتدل الامر غير مختلف ولا يغفل مخافة ان
يغفلوا او يملوا لكل حال عنده عتاد لا يقصر عن الحق
ولا يجاوزه الى غيره ، الذين يلونه من الناس خيارهم

افضلهم عنده اعمهم نصيحة واعظمهم عنده منزلة احسنهم
مواساة وموازرة ،

قال فسأله عن مجلسه فقال كان رسول الله صلى الله
عليه وسلم لا يقوم ولا يجلس الا على ذكر ولا
يوطن الا ما كن وينهى عن ايطانها واذا انتهى الى قوم
جلس حيث ينتهى به المجلس ويامر بذلك ويعطى
كل جلساءه نصيبه لا يحسبه جلسيه ان احدا اكرم عليه
منه ، من جالسه او قاومه لحاجة صابره حتى يكون
هو المنصرف عنه ، من سأله حاجة لم يرده الا بها او بميسور
من القول ، قد وسع الناس بسطه و خلقه فصار لهم ابا
وصاروا عنده فى الحق سواء ، مجلسه مجلس حليم وحياء

وَصَبْرٌ وَأَمَانَةٌ لَا تَرْفَعُ فِيهِ الْأَصْوَاتُ ، وَلَا تُؤْثِرُونَ ذَا الْحَاجَةِ
وَلَا تُنْثِي فَلَائِهِ مُتَعَادِلِينَ يَتَفَاضِلُونَ فِيهِ بِالتَّقْوَى مُتَوَاضِعِينَ
يُوقِرُونَ فِيهِ الْكَبِيرَ وَيَرْحَمُونَ فِيهِ الصَّغِيرَ وَيُؤْثِرُونَ ذَا الْحَاجَةِ
وَيَحْفَظُونَ الْغَرِيبَ ، فَسُئِلَتْهُ عَنْ سِيرَتِهِ صَلَّى اللَّهُ عَلَيْهِ وَسَلَّمَ
فِي جُلُوسَاتِهِ فَقَالَ كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ
دَأْبُ الْبَشَرِ سَهْلَ الْخَلْقِ لَيْنَ الْجَانِبِ ، لَيْسَ بِفَظٍّ وَلَا غَلِيظٍ ،
وَلَا سَخَابٍ وَلَا فُخَّاشٍ ، وَلَا عِيَابٍ وَلَا مَدَاحٍ ، يَتَغَافَلُ عَمَّا
لَا يَشْتَهِي وَلَا يُؤَيِّسُ مِنْهُ وَلَا يَتَكَلَّمُ إِلَّا فِيمَا يَرْجُو ثَوَابَهُ .
إِذَا تَكَلَّمَ اطَّرَقَهُ جُلُوسًا وَهُوَ كَأَنَّمَا عَلَى رُؤُسِهِمُ الطَّيْرُ وَإِذَا
سَكَتَ تَكَلَّمُوا ، لَا يَتَنَازَعُونَ عِنْدَهُ الْحَدِيثَ مِنْ تَكَلَّمَ عِنْدَهُ
أَنْصَتُوا لَهُ حَتَّى يَفْرَغَ مِنْ كَلَامِهِ حَدِيثُهُمْ حَدِيثٌ أَوَّلُهُمْ

يُضْحَكُ مِمَّا يَضْحَكُونَ وَيَتَعَجَّبُ مِمَّا يَتَعَجَّبُونَ مِنْهُ وَلَا يَقْطَعُ
عَلَى أَحَدٍ حَدِيثَهُ حَتَّى يَتَجَوَّزَهُ فَيَقْطَعَهُ بِأَنْتِهَاءِ أَوْ قِيَامِ
أَتَمَّهِ

اشبهو حديث شريفك مأل قدسيت اشتمالی بروجه زیر
پیرایه صحیفه تعظیم واعتبار قانندی :

حضرت حسن بن علی المرتضی رضی الله عنهما بیوررکه :
« مهر منیر رسالت صلی الله علیه وسلم اقدمزك هیئت وثمانیل
منوره سنی ، سوکیلی والدۀ مشفقہم حضرت فاطمة الزهراء رضی الله
عنہا بک برادری یعنی جناب خدیجۃ الکبری رضی الله عنہا بک
فرزند بلاغت پروری هند ابن ابی ہالہ رضی الله عنہا بک
زیرا کنیدیسی حایہ جالیہ حبیب کبریایی وصف و تعریفده
وصاف پاکیزہ زبان ایدی . شو امید ایله کہ حایہ مقدسہ
رسول الہدین بکا برشی وصف ایدردہ اوصفت سعادت انجامہ
تعلق ایلرم .

بوسؤالم اوزرینہ حضرت هند فصاحت بیان ، توصیف حایہ
شریفہ بہ باشلا یوب دیدی کہ :
ایکی جهان کونشی صلی الله علیه وسلم اقدمز ، حد ذاتندہ
تام الحاقہ اولوب ذات شریفہ محمدیہ سنہ امان نظر ایله باقاندک
چشم عبرتینلرندہ مہابتلی وعظمتلی کورینور ایدی . مبارک

یوزی آيك اون دردنجی کیجه سنده بدر منیر فصل پارلار و ضیا
ویرسه اوله جه پارلایوب نشرانوار فیوضات ایلر ایدی . قامت
سعادت نه اوزون . نه قیصه اولوب ایکیسی اورتسی بر شکل
دلشینده ایدی . مبارك باشی وقار و مکاتمه براءت استهلال اولمق
اوزره بیوجك . صاحلری نه پك قیویر جق نه پك دوز و کوشك
ایدی . طبیعتیه ایکی بلوکه آریلورسه مبارك باشك ایکی طرفه
صالیورر ، آریلورسه حالیه براقیر ایدی ، صاحلری اوزادینگی زمان
قولاق مملریخی تجاوز ایدر ایدی . مبارك یوزینك رنك ولونی غایت
حسن و صفوت اوزره کل کی قرمزیه مائل و پك آشوری بیاض
ولطیف ایدی . جبهه تابناکی کمال اعتدال اوزره کینش و کونش
کی منور و لامع ایدی . مبارك قاشلری هلال کی مقوس
واوزون و قیللر ایله طواغون اولوب بربرینه یقین ایدیسده
بتیشك دکل ایدی . ایکی قاشی اراسنده بر طمار وار
ایدی که حق یولنده غضب بیوردینگی وقتده قباروب کورینور
ایدی . مبارك برونی پك معتدل ولطیف وقاشلرینه یقین یری
براز کمرلیجه اولوب اوزرنده دائما نور لمعان ایتدیکی ایچون
بردفعه کوروبده تکرار اعاده نظر ایتیمان کیسه اول نور مجسم
رحتی ، یوکسك برونی ظن ایدر ایدی . مبارك صقالی صیق و تام
اولوب اوزون دکل ایدی . دوچشم خسدانینك قاردهسی غایتله
سیاه و بیاضی پك آشوری براق ایدی . رخسار سعادتلری
اعتدال اوزره اولوب شیشمان یوزلی ، یومری یناقلی دکل
ایدی . منبع علم و حکم اولان فم محترملری قوه فصاحت

ووسعت بلاغت رسالتناهیله برهان مجسم اولمق اوزره
واسع ایدی .

دیشلری اینجوکی صاف وسیرك ایدی . مبارك کوكسندن
کوبکنه وارنجهیه قدر قیلدن غایت اینجه بر خط نورانی وار
ایدی . کردن سعادتلری اوزون و غایتله موزون اولوب نور
محض کی پارلار ایدی . مبارك اعضای وجودی نه سمیز ، نه
ضعیف ، نه قیصه ، نه اوزون ، بلکه ایکیسی اورتسی و صیق
اتلی ایدی . قارنی کوكسیله برابر اولوب شیشمان دکل ایدی .
جواهر اسرار الهیه نك خزینه قدسیه سی اولان سینه رحمت
دینه سی غریض و واسع ایدی . مبارك اوموزلرینك اردهسی
کنش ولطیف صورتده یضی ایدی . وجود مقدسك ، مفصل
کمیکلری زیاده ایری ایدی . لباس ایله مستور اولان بدن
شریفی پك آشوری بیاض ولطیف و نورانی ایدی . سینه
لطیفك باشندن نافه مشکینه قدر خط کی اوزامش اولان
قیللردن بشقه مبارك مملری اوزرنده و بطن سعادتلرنده
اصلا قیل یوغیدی . مبارك اوموزلری وقوللری و کوكسك
یوقاری طرفلری معتدل صورتده موی غبرین ایله معطر ایدی ،
مبارك قوللری و بازولری طویقه و اوزونجه ایدی . ال آیهلری
حساً و معناً آچیق و وسعتلی ایدی . کرک ال آیهلری و کرک
پای عرش پایهلری ، اتلی و کمیکلی و کل یپراغی کی یموشاق ولطیف
ایدی . مبارك پارمقلری معتدل صورتده قالینجه و اوزون
وقلم کی دوزکون ایدی .

حاصلی خوب ایدی هر عضو ائک

جمله آياتی کبی قرآنک

مصدقچه اعضاء جلیله سی و مریتدن واعتدال خارجده.

ایر بایکدن مبرا اولوب سراپا احسن واجمل ایدی. مبارک ایاقلرینک
الهی چتور اولوب دوزدکل ایدی. قدمین سعادتلرینک اوستی
خشونتدن یعنی هر درلو یاریق و چاتلاق و پور توکلکدن آزاده
اولمسیله ابدست الدقلری زمان اوزر لرند صو طور میوب
بلا توقف سرعتله جریان ایدر ایدی. اول قافله سالار انبیا علیه
افضل التحایا اقدمز یوریدیکی وقت. قدم عرش پیمالرینی دفته
یردن قالدیرر وایکی طرفه تمایل ایتیمکسزین آدیملری اوکنه مائل
اولور ایدی. یوریشی چابوقچه و آدیملری اوزونجه اولمسیله برابر
وقار و تمکین اوزره کورینور ایدی. و یورر ایکن یوکسکدن
نزول ایدر کبی دائما اکیلور ایدی. بر جانبه عطف نظر التفات
بیورمی لازم کلسه بتون اعضاء و جسم پاکینه دونه رک ملتفت
اولور ایدی. دیده خدایینی ایله اطراف و جوانبه دیک باقمیوب
نظر سعادتلری اکثر یازمین منعطف ایدی. کمال تواضع و خشوعی
وباری تعالی و تقدس حضرتلرینه قارشی ادب و خضوعی حسیله
روی زمینه نظری جهت سمایه نظرندن دها زیاده ایدی. نگاه
حتسایق اکتناهی دائما اسرار تجلیات الهی بی فکر و ملاحظه
جهته متوجه ایدی. بر محله تشریف بیوردقلرنده اصحاب
ذوی الاحترامی اوکنده یوریدوب کندیلری ارقلرندن یورر

وهر تصادف ایتدیکی کیمسه یه سلام ویرمکه مسارعت بیورردی.
حضرت حسن رضی الله عنه دیر که جناب هند بدیع الیابک وصفی
بو محله منتهی اولدقده کندینتن مرکزیده انبیا علیه افضل التحایا
اقدامک نصل تکلم بیوردقلری استیضاح ایلدیکمده مشارالیه
دیدکی که: ادب آموزدین علیه صلوات المعین اقدمز همیشه امت
احمدیه سنک امور و احوالندن طولانی حزین و متأثر و تجلیات
رب عزتی و سرائر احکام آخرتی متفکر اولوب دنیادن اصلالذات
و راحت بولمز ایدی. لزومسز یرده بیورده سوز سویا میوب هر کلامی
حکمت و نصیحت ایدی. اکثر یا سکوتی اختیار بیورردی. سوزه
ذکر الله ایله باشلار. ذکر الله ایله ختام ویرردی. بر جوق معنایی
آز سوز ایله افاده ایدردی. کلامنده طلاق و فصاحت. بیاننده
بلاغت و ارایدی. هر کسه معامله سی دلنوازانه و لطافت و روانه ایدی.
ملایم و متواضع ایدی. کیمسه یه نظر حقارت و اهانتله باقماز.
وسرت معامله ایتمز ایدی. هر نعمتی قدر آزا اولورسه اولسون
استعظام ایدردی. ماکولات و مشروباتی لذتسز لکندن طولانی
ذم ایتدیکی کبی لذتندن ناشیده مدح بیورمز ایدی. ذات
رسالتپناهیلرینی دنیابک جادومالی. وسائر درلو احوالی دارلتمز
ایدی. بر کیمسه حقدن عدول و باطله تعدی و رکون ایتسه
اولقدر غضبناک اولوردی که تجاوز و تعدی اولنان حق. هر نه ایسه
یرینی بولمدقچه هیچ بر قوت. خشم و غضب حق جویانه سنه مقاومت
ایده مز ایدی. حظ نفسی ایچون کیمسه یه انفعال ایتمز و هیچ
بر خصوصه نفس نفیس رسالتپناهینه یاردم ایتمز ایدی. بر شیده

اشارت بیورمی لازم کلسه ، ارباب کبر و جبر و تنک عادت خود پسندانه سی وجهله پارمغیله اشارت ایتیموب مبارک یدهایونلریله اشارت بیورردی . شایان تعجب واستحسان برشی تماشایورددقلرنده تقلبات و تقابلات کونییه ایماء مبارک ال آیه سنی جانب آسمانه منعطف ایدیسه جهت زمینه چو یور ؛ ویره طوغری آچیق بولنورسه سوی سمایه تقلیب ایلر ایدی . تکلمه باشلادیغنده باش پارمغنی صول آووجنه ضرب ایدر ایدی . برکیمسه یه دارلسه لوم و عتاب ایتکسزین یالکز . وجه مبارکنی اندن چویرر ایدی . زمان فرح و سرورنده مبارک کوزلرینی یوموب سرفرو برده زمین تواضع اولور ایدی . کولسی تبسم درجه سنده ایدی . کولدیکی زمان مبارک دیشلرندن نور صاچیلور ایدی .

بو محله کلنجه حضرت حسن رضی الله عنه دیرکه : خال محترمک حایه جالیله یه عائد اولان بو حدیثی نیجه زمان برادر جانبر ابرم حضرت حسین رضی الله عنهدن کتم و پنهان ایدوب صکره بسط و ایضاح ایلدی کمده کنیدیسنی بوبابده حائز قصب السبق معلومات بولدم . زیرا حلیه مقدسه نبویه بی بدن اول مشارالیه حضرت هندن سؤال ایتمش وانک روایتته قناعت ایتیموب پدر عالی کهری جناب مرتضی رضی الله عنه حضرتلرندن دخی حیب کبریا صلی الله علیه وسلم اقدمزک خانه سعادتلرینه نصل کوروب حیق دیغنی و مجاس سعادتنک کیفیتنی و صورت و سیرتنی و الحاصل اوصاف و احوال رسول کریمدن هیچ برشی بر اقمیه رق جمله سنی صوروب اوکر نمشیدی . بو معلومات تامه سنه بناء امام حسین

رضی الله عنه دیدیکه : « رسول اکرم صلی الله علیه وسلم اقدمزک مهبط جبریل امین و تجلیگاه رحمت رب العالمین اولان خانه سعادتلرینه کیفیت دخولنی پدر مکرمدن صور دیغمده جواباً بیوردیکه : سیدالانیا اقدمزک خانه سعادتلرینه تشریف اذن مطلق خدایه مقرون ایدی . دولسرای رسالتیناهیلرندن بولندقلری وقتی ، اوچ قسمه تقسیم ایله بر قسمنی نماز و تلاوت قرآن کبی عبادت رب عزته و بر قسمنی اهل و عیالیه حسن معاشرت و انلرک ایشلرینی تسویه و تمشیته و اوچنجی قسمنی نفس شریفنه عائد مصاحبت و استراحتیه تخصیص بیورمش ایدی . صکره نفس نفیس نبوتیناهیلرینه عائد اولان وقتی ، کندی نفسیه ناس بیننده تقسیم ایتمش ایدی که اول وقت خاص الحاصده حضور سعادتمو فور رسالتیناهیلرینه الحق خواص اصحاب کرام کوروب عوام کیردمز ایدی . خواص مشارالیه لسان معجز بیان نبوتیناهیلرندن هر نه ایشیدیرلر ایسه عوام خاقه تعلیمه مأمور اولدقلری جهتله بو نقطه نظرندن عوام دخی بو مجلس خصوصی نبویدن بهره مند فیض و سعادت اولورلر ایدی و محرم سرائر نهانخانه احدیت اقدمز اصحاب و امته متعاق و نافع اولان خصوصاتک هیچ برینی کتم و دریغ بیورمز ایدی .

شریفاب عز حضور هایونی اولمق ایستیان اصحابدن پیرایه دار علم و تقوی اولانلری جمله دن اول مظهر شرف قبول بیوروب انلره وجهه نمای توجه و اقبال اولور ایدی . تا که سائر ناس ، صلاح و تقوانک بارگاه کبریا پناه مولاده و نزد سیدالانیا

مقبول و معتبر اولدیغنی بیلوب حلیه صلاح و تقوی ايله تحلیه ذات و صفات ایتمه سهی و غیرت ایلهر . و دنیا و آخرته متعلق اولان امور خیریه بی هرکسک دین یولنده کی فضل و مزیتته کوره تقسیم ایدوب حسب و نسب جهتی کوزتمز ایدی .

سبب آفرینش کائنات افندمزك حضور سعادتهنه شرفیاب مثول اولانلردن بعضیسنك بر حاجتی و بعضیسنك ایکی حاجتی و کیمنك بر چوق حاجتلی اولسیله سرار شناس اولین و آخرین افندمز حضرتلری انلردن هر برینك افادات و حاجاتنه عطف نظر التفات و اهتمام و ایفای مقتضیاتیه اشتغال بیورردی .

اصحاب کرامنك رحمة للعالمین افندمز دن کرک دنیوی و کرک اخروی سوال ایتدکلری شیلردن سائلک حالنه مناسب و سزاوار ، آخرته یارار هر نه ایسه آنی افاده بیوردیغنی جهتهله دائما آنلری امور خیریه ايله مشغول قیلار ایدی .

مجلس ملائک انیس نبویلرینه شرفیاب دخول اولانلرک موضوع بحث ایتدکلری مسائل دینییه کنیدیلرینه تعالیم و افاده بیوردقدن صکره « بوجملده هر نه استفاده ایتدیکنز ایسه بوراده حاضر بولنمیانلره تعلیم و تبایغ ایدیکنز و بکا کلوب عرض حاجات ایتمه قدرتلری اولمیانلرک حاجتلینی بکا بیلدیریکنز زیرا عرض حاجت ایتمه قادر اولمیان برکیسهنك حاجتی هرکیم سلطانه عرض و تبلیغه توسط ایدر ایسه حق جل و علا حضرتلری واسطه عرض اولان ذاتی یوم قیامتده صراط

اوزرنده یابر جای ثبات ایدر » خطابیله آنلره اجرای وصایا و تنبیهات بیورر ایدی .

حضور لامع النور نبوییه چهره سای ابحال اولان ارباب حاجات ، امور دینییه دن بشته برشی عرض ایتدکلری کبی رسول اکرم افندمز دخی بوندن غیری سوز سویلمز و منافع دینییه و لوازم دنیوییه متعلق اولمیان بی فائده سوزی قبول و استماع بیورمز ایدی . خواص اصحاب کرام . طالب علم و حکمت اولدقلری حالده مجلس خاص الخاص سیدالانبیایه شرفیاب دخول اولوب بهره دار کمال معرفت و سعادتمند ارشاد و هدایت اولدقلری حالده اوجاس فیضا فیض هدادن چیتارلر ایدی .

نوباوه باغ اصطفای امام حسین رضی الله عنه دیرکه : پدر قدسی کهرمك سوزی بومرتبه یه کلنجه رسول اکرم صلی الله علیه و سلم افندمزك سعادتمخانه رسالتپناهیلرندن خارجه چیتدقلرنده نه ايله اشتغال بیوردقلرینی صوردم . جواباً بیوردی که : مفخر انس و جان افندمز دائما اصحاب کرامنه فائده و یردجك سوزلر سویلر و مالایینی دن کف لسان ایلر ایدی . و اصحاب ذوی الاحترامنك یکدیگری بیننده الفت و محبتی تزئید ایدجك صورتده ارازلرینی تألیف ایایوب تفرقه و اختلافه بادی اوله حق کلام ايله تکلم بیورمز ایدی .

هر قوم و قبیله نك کریم الطبع اولان بیوکنه التفات و اکرام ایلر و آنی کنیدی قومی اوزرینه رئیس نصب ایدر ایدی . حال و شانی بیلنمیان کیسه یه قبل التجربه میل ورکون ایتماک

حکمت عملیه سی مقتضای سنجه بادیه نشینان خلقدن حذر ایدوب
مکروشرلرندن تحفظ بیورمقله برابر آنلرک هیچ برندن بشاشت
وجهنی وحسن خلقنی دریغ ایتوب هپسنه کولر یوزله و طاتلی
سوزله معامله بیورر ایدی . مجلس انور رسالتپناهیلرنده
ویاخود جامع و جمعه ده کورمدکاری اصحاب کرامنک ، حال
وشانلرینی دیکرلرندن صورار و عندالحاجه زیارت و عیادتلرینه
کیدر ایدی . واحوال و معاملات امتی دائما تحقیق و تفتیش ایله
رضای الهییه . موافق کوردیکی شیلری تصویب و تحسین و امر
ربانییه مغایر اولان امور و وقوعائی تقییح ایله سبب قبح و نهی
ایضاح و تبیین بیورر ایدی . هر حال و کارده التزام کمال اعتدال
بیوردیگی کبی تحسین و تقبیحی دخی شائبه اطرا و مبالغه دن
مصون ایدی . اصحاب کرامنک ذاتلرینه مخصوص اموردن دخی
دیده پوش غفلت و دوچار قور و ملالت اوله بیاملری احتمالیله
مشارالیهکم مصالحدن اصلا تغافل بیورمیوب دین و دنیاالرنجه
منفعتلرینی کافل اولان شیلری یاد و کندیلرینی دائما طوغری یوله
ارشاد بیورر ایدی .

دنیوی و اخروی مادی و معنوی هر امر مشکله قارشو
عند رسالتپناهیلرنده تدبیر عاجل و علاج کافل وار ایدی .
اقامه حدوداللهده تسامح بیورمدینی کبی مرتبه حقندن دخی
تجاوز ایتمز ایدی .

شریاب قرب نبوتپناهیلری اولانلر ، ناسک اک خیریلری
و خیره سعی ایدنلری ایدی . نزد جلیل حقایق پناهیلرنده

خالقک افضل و اعظمی ، هر کسه خیرخواه اولوب اک زیاده
نصیحت و ارشاده چالیشانلر و فقیر و بیوایه اولانلره حسن صورته
اعانه ایدنلر ایدی .

سیدالشهدا امام حسین رضی الله عنه دیرکه : پدرعالیقدرمی
فخر الانبیا اقدمزک مجلس ملائک انیسارنده کی عادات شریفه سندن
دخی سؤال ایلدیکمده دیدی که : رسول اکرم صلی الله علیه وسلم
افدمز ذکرا الله اوزرینه اوتوروب ذکرا الله ایله قیام ایدردی .
سعادتخانه نبوتپناهیلرندن غیری یرلرده کندی نفس نفیس
هایونچون نشیمنگاه . انتخاب و اتخاذایتمز و بو حال و حرکتدن
اصحاب کرامنی ده منع ایلر ایدی . برمحلی تشریفارنده باش طرفه
چکمیوب کیف مالتفق هر نزد سنی بوش بولورسه اورایه
شرفبخش جلوس اولور ایدی . و تصدر داعیه سنده اولاملرینی
اصحاب کرامنه تنبیه بیورر ایدی .

هم بزم شرف صحبتی اولانلری سلام و کلام رسالتپناهیلرندن
محروم براقیوب هر برینی حال و استعدادینه کوره بهردمند
خطاب و التفات ایدر ایدی . مجلس شریف عرش آستانده
بولسانلرک هر بری نائل اولدینی التفات حسیه « رسالتآب
افدمزک نزد همایونلرنده بندن دها سوکیلی و محترم کیمسه
یوقدر » ظن و دعوا سنده بولنور ایدی .

اول فاتحه کتاب خلقت صلی الله علیه وسلم اقدمزه امور
دینیه و دنیویه دن برشی عرض و استیذان ایچون هر کیم وجهه نمای
ابجال اولسه اوکیمسه کندی ایستکایه حضور سعادتمندن قالدوب

کینجه به قدر صبر و انتظار بیورر ایدی . حقیقت پرور
جود و کرم صلی الله علیه وسلم اقدمزدن بر کیمسه بر شی طلب
و سوال ایتسه رد و نهر ایتیموب یا حاجتی روا و یا خود وعد
و تسلیته کوکنی ممنون و احیا ایدر ایدی . اول نور مجسم رحمت
اقدمزك حلم و کرمی و خالق مکرمی جمیع ناسه شامل ایدی .
احباب و امته بشفقت و مرحمتده آب شفیق کبی ایدی . احباب
کرامی نظر تقدیر و اعتبارنده حقوق جهتدن هپ برابر و فضل
و تقواده بر برندن متفاضل و برتر ایدیلر .

مجلس سعادت انیسی ، نور حلم و حیا و ضیای صبر و امانتله
منور و مزین ایدی . حضور سعادت نشور هایوننده یوکسک
سسله لقردی ایدلیوب صوت لطیف روح پرورندن دعا یواش
سویاشیلور ایدی . هیچ کیمسه نك عیب و قصوری سویلنمز
و کیمسه به اسناد تهمت اولنمز ایدی . احباب کرامدن بالفرض
و التقدیر او مجلس انسا انس کرمده برزله و خطا صادر اولسه فاش
ایدلمز ایدی . سنا بیوک اولانلره تعظیم و احترام و کوچکلر درأفت
وا کرام و ارباب احتیاجه معاونت و غربایه مظاهرت اولنور ایدی .
ینه نور دیده زهرا امام حسین رضی الله عنه بیورر که رسول
اکرم صلی الله علیه وسلم اقدمزك جلسایی حقنده کی سیرت
نبویه سندن پدراجمدی صوز دیغمده دیدی که : سیدالکونین
اقدمزك روی تابناکی دائما بشوش ، خویی و معامله سی پک
آشوری کوزل ایدی . قول و فعلنده سرتلك یوغیدی . فنا
سوز سویلنمز ، کیمسه نك عیب و قصورینی ذکر ایلنمز ، مدح

و ستایشده مبالغه ایتمز ، مرضیسی اولیان امور مباحه دن تغافل
بیورر . کیمسه بی جود و لطفندن محروم و مأبوس قیلنمز ، و امید
ثواب ایتدیکی فائده سز سوزلرله تکلم بیورمز ایدی .

سراثر آموز دین علیه صلواة المعین اقدمز سوزه
باشلاد قلرنده زانوزده حضور سعادت اولان احباب کرام
سرفرو برده ادب اولورلر و گویا مرغان هوا باشلری اوزرنده
قرار ایتمش کبی اظهار سکونت ایدرلر ایدی . ناطقه پیرای
« ما ينطق عن الهوى » اقدمز تکلمدن فراغت بیورد قلرنده
انلرده سوزه باشلار ایدی . مجلس رسالتیناهیده حاضر بولند قلری
مدتجه بر برلر یله تعاطی کلام ایتزلر ایدی . ایچلرندن بری
سوزه باشلاسه اکمال کلام ایدنجه به قدر دیگرلری صوصار ایدی .
مجلس سعادتده کی صوک سوزلری ایلک سوزلری کبی شائبه
ملالندن عاری ایدی . سیدالعالین اقدمز احباب کرامک
کولدکلری شیدن بحکم المؤانسه تبسم بیورر و تعجب ایتدکلری
شیدن خاطرلرینی تطیب ایچون تعجب ایدر ایدی . و شرفیاب
مجلس سعادت اولان احبابدن هیچ برینک سوزینی کنیدیسی
بتور مدجکه و یا قالقوب کیتمدجکه کسمز ایدی .

انتهی ما اردنا من ترتیب النقول و نرجو من محض فضل الله
القبول و الحمد لله رب العالمین و صلی الله علی مولانا محمد
و آله و صحبه فی کل لمحۃ و نفس عدد ما وسعه علم الله